

## M241Y: Priester Wernher: Driu liet von der maget (D)

0,1    eines liedes ich beginne  
0,2    in sancte – minne  
0,3    der êwigen kûninginne .  
0,4    diu geruoche . ouch mîn sinne .  
0,5    und mîne bruste erreinen .  
0,6    vore aller slahte meile .  
0,7    daz ich nû müeze . schrîben .  
0,8    von ir diu allen wîben .  
0,9    die itewîze hât benomen .  
0,10    daz der tôt was bekommen .  
0,11    von dem êrsten wîbe in die werlte .  
0,12    sît wart diu hêre maget erwelte  
0,13    dâr zuo daz beidiu man und wîp .  
0,14    daz licht und den êwigen lîp .  
0,15    mit der wârheit muose schouwen  
0,16    dâ ze ire vile tiurer vrouwen .  
0,17    si gebar den wâren sunnen .  
0,18    si ist aller genâden wûnne .  
0,19    wie wole si iz allez undervienc  
0,20    swaz Evê sünden ie begie  
0,21    wan si hât gebüezet wole den val  
0,22    ire kiusche liuhtet überal .  
0,23    nû schulen wir ir getrûwen .  
0,24    wande wir in dem tôde bûwen  
0,25    daz si uns ellenden .  
0,26    müge wider heime gesenden .  
0,27    und uns geruoche wîsen .  
0,28    zuo dem vrônen paradîse .  
0,29    dâ vrouwe Evê ûz geviel .  
0,30    ab dem mere kan si den kiel .  
0,31    wole bringen und geleiten .  
0,32    ûz den sorgen und den arbeiten .  
0,33    ze der himelischen porte .  
0,34    mit dem gotesworte  
0,35    ir wart diu wârheit gesaget .  
0,36    sie ist muoter und maget .  
0,37    si ne hât der engel niht betrogen .  
0,38    got hât daz ire spünne gesogen .

0,39 abe ire vile reinen brusten .  
 0,40 die mannes nie gelusten .  
 0,41 noch necheiner sünden teil .  
 0,42 sie ist iemer muoter âne meil .  
 0,43 von êwen und ze êwen .  
 0,44 wir schulen sie an ruofen unde vlêhen .  
 0,45 “himelischiu vrouwe .  
 0,46 mit geistlichem touwe .  
 0,47 begiuz den mînen gedanc .  
 0,48 daz ich dîn lop und dîn gesanc .  
 0,49 ein teil gemêren mûeze .  
 0,50 und hilf mir daz ich gebûeze .  
 0,51 daz unreht daz ich ie begie  
 0,52 wan ich gezwîvelete nie .  
 0,53 an dir noch an dînem kinde .  
 0,54 des lâ mich genâde vinden  
 0,55 und lâ mich ouch geniezen .  
 0,56 daz dû nie ne erluzze  
 0,57 decheinen irdischen man .  
 0,58 der dich ze vogete wolte hân  
 0,59 dû bist liehter denne der tac .  
 0,60 aller tugende wâz und smac .  
 0,61 vliuzet ûz dîner schôze .  
 0,62 nû bedenkes vrouwe grôze .  
 0,63 waz dir der engel brâhte .  
 0,64 dô got an dir bedâhte .  
 0,65 aller mennischen nôt .  
 0,66 und dir die mandunge entbôt .  
 0,67 in ditze klagelîchez tal .  
 0,68 daz er dich ze einem sal  
 0,69 im selben wolte wîhen .  
 0,70 wie mahtest dû mir verzîhen .  
 0,71 guoter rede und guoter liste .  
 0,72 dû bist diu obereste .  
 0,73 nâch gotes magenkrefte .  
 0,74 daz liet ich an hefte .  
 0,75 ûf dîne genâde volle .  
 0,76 dû bist daz tou in Gedeonis wolle .”  
 0,77 nû wile ich iu den orthaben .  
 0,78 beidiu künden unde sagen .  
 0,79 daz ich die materje .  
 0,80 mit himelischem here .  
 0,81 und diu starken mære  
 0,82 al desten baz bewære .  
 0,83 – êwangeliste .  
 0,84 der schreip iz von Kriste .  
 0,85 und von der muoter diu in truoc .  
 0,86 dannen schreip er zeichen genuoc .

0,87 doch was diu rede bedwungen .  
0,88 in hêbrêischer zunge .  
0,89 unze an sant Hieronimum .  
0,90 der tet daz durch den gotessun .  
0,91 und durch zweier bischove rât .  
0,92 daz er daz liet gewîteret hât .  
0,93 in die semften latîne .  
0,94 daz wazzer wart dâ ze wîne .  
0,95 diu milch verwandelt sich in daz ôle .  
0,96 dô er uns schreip alsô wole .  
0,97 diu wüeste wart erbûwet .  
0,98 dô disiu rede niuwe .  
0,99 ûz wart gekündet .  
0,100 des hæte in geschündet .  
0,101 Chromatius und Heliodorus .  
0,102 die bischove hiezen alsus .  
0,103 die santen im ire brief .  
0,104 daz er die schrift diu êr dâ slief .  
0,105 mit predige muose erwecken .  
0,106 und die süezen lêre entdecken .  
0,107 diu êr was beschatwet .  
0,108 diu goteskind ire brôt .  
0,109 und ire spîse vunden dâr an .  
0,110 der in winden küninliche vane .  
0,111 der wart dô wole begreifet  
0,112 und vüre daz here geweifet .  
0,113 daz diu kristenlîchiu schare ensament  
0,114 muose îlen dare  
0,115 ze geistlichem sturme  
0,116 gegen dem lintwurme .  
0,117 dâ der sige scholte ergên .  
0,118 von der vinsten schulen ouch wir erstên .  
0,119 ze dem êwigem liehte  
0,120 got geschuof uns von niehte  
0,121 der ist unser vater guoter  
0,122 nû bitet sîne muoter .  
0,123 daz sie uns hier behüete .  
0,124 mit ire tûsentvaltiger güete  
0,125 der lêrære heizet Hieronimus .  
0,126 der im gezimbert hât ein hûs .  
0,127 mit disem buoche hin ze gote .  
0,128 swaz – der vrônebote  
0,129 hêbrêischen liuten versaget .  
0,130 dirre hêrre des niht verdaget  
0,131 in der rehten latîne  
0,132 von dem êwigem urschîne .  
0,133 er kunde wole kôsen  
0,134 von der liljen und von der rôsen .

0,135 diu der dorne nie ne hât .  
0,136 nû wolte ouch ich den ir rât  
0,137 und ir helfe  
0,138 suochen . obe si des wolte ruochen .  
0,139 daz ich mit diutischer rede .  
0,140 daz buoch bræhte her ze wege .  
0,141 daz sie iz alle muosen lesen .  
0,142 die goteskint wel wesen .  
0,143 unde ouch megen schouwen .  
0,144 die lein und die vrouwen .  
0,145 smecken und ervinden .  
0,146 von dem vrône kinde .  
0,147 daz im die muoter erkose .  
0,148 diu ire magettuom nie verlose .  
0,149 und niemer mac verliesen .  
0,150 an der megen wir wole kiesen .  
0,151 wie rehte genædic sie sî .  
0,152 der daz kint sitzet bî .  
0,153 daz beidiu lewe und lamp ist .  
0,154 ob allen dingen ze obereste .  
0,155 beidiu leben und tât .  
0,156 hirte und lebentigez brôt .  
0,157 tou unde bluome .  
0,158 gelt unde ruowe .  
0,159 wênic und michel .  
0,160 vore allen sünden sicher .  
0,161 vater unser gotes sun .  
0,162 invalte unde wîstuom .  
0,163 grôz und kleine .  
0,164 daz ist er alterseine .  
0,165 der uns in noeten erschein .  
0,166 er nam hier vleisch unde bein .  
0,167 und die reinen mennischheit .  
0,168 hoehet er mit der goteheit .  
0,169 von der erde hin ze himele .  
0,170 an sînes vaters gesidele .  
0,171 dô wart diu helle zebrochen .  
0,172 unde wurden wir errochen .  
0,173 an dem tiuvel der uns bant .  
0,174 des loben wir den heilant  
0,175 sîn gezelt stuont in der sunne .  
0,176 besigelt ist der brunne .  
0,177 ungebrâchet ist der anger .  
0,178 ire quarter hât ertôt den slangen  
0,179 den nît wile ich verdingen .  
0,180 unze ich vüre bringe .  
0,181 disiu seltsænen wort .  
0,182 swaz – schreip dort .

0,183 den hêbrêischen liuten .  
0,184 daz wile ich iu bediuten .  
0,185 mit der helfe unde volleiste .  
0,186 des heiligen geistes .  
0,187 ich weiz wole des tiuvels strît .  
0,188 dicke winthalsen gât .  
0,189 boesez nîtbecken .  
0,190 und eiterigez hecken .  
0,191 der unverwizzenes dietes .  
0,192 daz si schelten diu liet .  
0,193 diu in wîslîcher ahte .  
0,194 vergelten niemannd mahte .  
0,195 noch mit grôzem guote widerwegen .  
0,196 die wæne ich den vluoch vûre den segen .  
0,197 vone gote . entvâhent .  
0,198 die sich dâr an vergâhent .  
0,199 swer ditze liet bespreche .  
0,200 sancte – muoz ez rechen .  
0,201 der ez ze dem êrsten schreip .  
0,202 und den irretuom vertreip .  
0,203 den Manichei junger satzte .  
0,204 dô er sîne zunge watzte .  
0,205 in üppigez kôse .  
0,206 doch wolte die rede boese .  
0,207 diu kristenheit niht entvâhen .  
0,208 dô sie die lûge sâhen .  
0,209 der junger hiez Leuciô .  
0,210 und wart verworfen alsô .  
0,211 daz sîn rede ist begraben  
0,212 und sie niemanndn getar sagen .  
0,213 wan si mit durren zwîn stât .  
0,214 nû si der wurze niene hât .  
0,215 – der êwangeliste .  
0,216 nam im sô lange vriste  
0,217 unze er ez vile rehte gar ervüere .  
0,218 daz weder mos noch mûre .  
0,219 sîniu worte en mac getrüeben .  
0,220 des lât ouch iuch genüegen .  
0,221 und sancte – lêre .  
0,222 die mûgen iu gehelfen an der sêle .  
0,223 bî den selben zîten .  
0,224 got en was niht kûndic wîten .  
0,225 wan eine erkant in Judeâ .  
0,226 vremede was er anderswâ .  
0,227 dô was der heidenschefte vile .  
0,228 die des tiuveles spil .  
0,229 an den apgoten begiengen .  
0,230 des ouch sie schaden gevâhen .

0,231 an dem lîbe und an der sêle .  
0,232 dô behielt die gotes êwe .  
0,233 diu israhêlische diet .  
0,234 als in – geriet .  
0,235 unde ire vater Abraham .  
0,236 dem wâren sie gehôrsam .  
0,237 Isaac und Jakop dâ nâch .  
0,238 der hin ze himele sach .  
0,239 ein leiter von der erde gerihte .  
0,240 dâ got ze sîner gesihte .  
0,241 selbe wider in sprach .  
0,242 wonders im ouch mêre geschach .  
0,243 dô er den engel gevienc .  
0,244 und in des morgenes nie entlieze .  
0,245 unze er in gesegenete .  
0,246 diu huf im dorrete .  
0,247 dâ in der engel druhte .  
0,248 hin nâher er sie geruochte .  
0,249 ze einem urkûnde  
0,250 hinken dô begunde .  
0,251 der heilige patriarche .  
0,252 des wunderete starke .  
0,253 allez sîn geslehte  
0,254 als ez vile wole mahte .  
0,255 sie wurden des vrôuwen .  
0,256 daz er was beschouwet .  
0,257 von gotes aneblicke .  
0,258 si suochten venje dicke .  
0,259 gegen den himelischen koeren .  
0,260 hier müget . ir wunder hoeren .  
0,1139 daz müeze mir bescheinen .  
0,1140 wie ich in schule loben unde meinen .  
0,1141 ê daz got mennische würde .  
0,1142 âne süntelîche bürde .  
0,1143 swie guot die liute wâren .  
0,1144 unde diu kint die sie gebâren .  
0,1145 doch begên wir ire dulte niht .  
0,1146 wizzet ir umbe weliche geschiht .  
0,1147 wâr umbe wir daz mîden .  
0,1148 daz wir sie niht vîren .  
0,1149 noch in diu êre gesetzet ist .  
0,1150 unze unser hêre Krist .  
0,1151 sie selbe erledigete .  
0,1152 ûz angestlîcher nôt .  
0,1153 durch des êrsten mannes sünde .  
0,1154 was daz tief apgründe .  
0,1155 gericht von den sêlen .  
0,1156 die muosen dâr kêren .

0,1157 soliche unde sameliche .  
0,1158 beidiu arme unde rîche .  
0,1159 dô wart nechein gebeine .  
0,1160 sô lûter noch sô rein  
0,1161 daz daz mahte bewarn .  
0,1162 si ne muosen alle dâr varn .  
0,1163 unde mit langem sêre erbîten .  
0,1164 der ôsterlîchen zîte .  
0,1165 daz daz êwige urschîn .  
0,1166 erlûhte enmitten under in .  
0,1167 unde des kriuzes insigele .  
0,1168 daz zeichen von himele .  
0,1169 der helle gewelte entrante .  
0,1170 die sêle erlôste . den tiuvel geschante .  
0,1171 dô hiez got über die sînen .  
0,1172 ein michel licht erschînen .  
0,1173 ein grôze berhtel unde glast .  
0,1174 nû hoeret wie des kriuzes ast .  
0,1175 unde der vile heilige stamme .  
0,1176 erlediget wîp unde man .  
0,1177 sît der heilic aller heiligen .  
0,1178 beidiu siech unde lôn .  
0,1179 aller der werlte erzeugte .  
0,1180 diu sich zuo im geneigte .  
0,1181 und diu helle zebræste .  
0,1182 sît wart uns diu vaste .  
0,1183 geboten unde diu banvîre .  
0,1184 durch die holden sîne .  
0,1185 die solichiu werc worhten .  
0,1186 daz sie den tôt niene vorhten .  
0,1187 durch die gotes minne .  
0,1188 Moses unde sîn gesinde .  
0,1189 die dâ vore lebeten .  
0,1190 swie vile tugende sie pflegeten .  
0,1191 ire dulte doch niemannd begât .  
0,1192 diu an ire jârzîte gestât .  
0,1193 wande sie den nie gesâhen .  
0,1194 des sie ze hêrren jâhen .  
0,1195 der sît under mennischen gie .  
0,1196 unde sich kriuzigen lie .  
0,1197 durch liebe der kristenheit .  
0,1198 diu nû wît ist unde breit .  
0,1199 Dâvît unde Abraham .  
0,1200 daz wâren vürsten lobesam  
0,1201 Isaac unde Josuê .  
0,1202 und Jakop in der alten êwe .  
0,1203 joch diu tochter Isaac .  
0,1204 diu unser vrouwen gebar .

0,1205 unde ire vater Joachim .  
0,1206 die hæten allen ire sin .  
0,1207 an got starke gewendet .  
0,1208 des en wurden sie niht geschendet .  
0,1209 sie sint in deme himelrîche .  
0,1210 den engeln gelîche .  
0,1211 und sint dâ sô gevristet .  
0,1212 daz in dâ nihtes gebristet .  
0,1213 wan des alterseine .  
0,1214 daz wir sie ûz scheiden .  
0,1215 an unsern hôchzîten .  
0,1216 durh daz sie muosen biten .  
0,1217 der gotes ledigunge .  
0,1218 unde âne des lîbes wandelunge .  
0,1219 die helle muosen schouwen .  
0,1220 mit allem ire gezouwe .  
0,1221 nû ruofet sie an alle .  
0,1222 von herzen . niht mit des mundes schalle .  
0,1223 dâ sie nû sint gevüeret .  
0,1224 von dem tiuvel umberüeret .  
0,1225 daz daz heilige ingesinde .  
0,1226 vore hazze joch vore nîde .  
0,1227 uns armen ruoche entbinden .  
0,1228 daz wir sie her nâch vinden .  
0,1229 in den himelischen êren .  
0,1230 sô wir ûz dem ellende kêren . âmen  
0,1231 nû vernemet die semften lêre .  
0,1232 von der megede hêrere  
0,1233 diu uns den heilant gebar .  
0,1234 guotiu herze hebet . iuch dâr  
0,1235 dâ ir daz heil gewinnet .  
0,1236 des iu niemer zerrinnet .  
0,1237 bitet sie der underdige .  
0,1238 daz sie vlêhelîchen lige .  
0,1239 ire trûtsune an dem vuoze .  
0,1240 unze er uns gebüeze .  
0,1241 unser leit und unser sêre .  
0,1242 der pfaffe heizet Wernhere .  
0,1243 der des liedes began .  
0,1244 von dem er urkûnde nam .  
0,1245 der ist ouch von Kriste .  
0,1246 ze einem êwangeliste .  
0,1247 gesegenet unde gewîht .  
0,1248 niemannd ime des verzîhet .  
0,1249 – ist der orthabe .  
0,1250 der rætet daz man ûz trage .  
0,1251 die margarîten an daz licht .  
0,1252 daz sie werde vertunkelt nicht .

0,1253 in dem irdischem stoube .  
0,1254 jâ hilfet uns der geloube .  
0,1255 den wir zuo der küninginne hân .  
0,1256 sô wir dem tiuvel widerstân .  
0,1257 sie ist des himels vrouwe unde brût .  
0,1258 sie beschirmet wole daz liut .  
0,1259 und alle ire undertâne .  
0,1260 die getuot sie sorgen âne .  
0,1261 sie hât den heiligen daz lôn  
0,1262 gemêrt mit des lebenes krône .  
0,1263 wande allez mannes künne .  
0,1264 ienoch ze helle brünne .  
0,1265 wære in diu maget niht komen .  
0,1266 diu sie ûz der nôt hât genomen .  
0,1267 sie ist ein kristalle .  
0,1268 über die engel alle .  
0,1269 ein liehtvaz in der vinsten .  
0,1270 sie zücket uns von der winster .  
0,1271 daz wir zeswenhalben gestên .  
0,1272 sô wir an daz gerihte gên .  
0,1273 alle ir volgære .  
0,1274 nû bitet den sagerære .  
0,1275 den der heilic geist begôz .  
0,1276 daz sie mîne sünde alsô grôz .  
0,1277 mit genâden wole bedecke .  
0,1278 unz ich diu herze erwecke .  
0,1279 diu noch slâfente sint .  
0,1280 daz sie erkennen daz kint .  
0,1281 daz sie mit armen umbe vienc .  
0,1282 dô sie ze kemenâten gie .  
0,1283 bî der smæhen krippe .  
0,1284 dô wart Adâmes rippe .  
0,1285 an der vrouwen wole geêrt .  
0,1286 sie hât uns alle vrôuwede gemêrt .  
0,1287 dô sente Marîe .  
0,1288 diu edele und diu vrî .  
0,1289 diu maget unberüeret .  
0,1290 zuo dem – wart gevüeret .  
0,1291 in der stat ze Jerusalême .  
0,1292 ire êre begunde dô ûf gên .  
0,1293 erkant wart sie wîten .  
0,1294 wande sie in den selben zîten .  
0,1295 erlûhte sam diu sunne .  
0,1296 ûz allen ire künne .  
0,1297 ire antlütze was sô tugentlîche .  
0,1298 ire ougen alsô küninclîche .  
0,1299 ire gebærde alsô reine .  
0,1300 daz sich zuo ir gelîchte decheine .

0,1301 under allen den vrouwen .  
0,1302 sie muosen an schouwen .  
0,1303 diu liute mit vorhten .  
0,1304 swâ andere vrouwen worhten .  
0,1305 lînwât unde sîden .  
0,1306 ir necheiniu mahte erlîden .  
0,1307 alsô vile der arbeit .  
0,1308 sô ditze kint vroelîchen leit .  
0,1309 den tĒmpelhêrren ze minne .  
0,1310 sie worhte mit rîchem sinne .  
0,1311 al des sie begunde .  
0,1312 swaz sô wîbes hant kunde .  
0,1313 daz en mahte ir niht entgân .  
0,1314 des nahtes îlte sie ûf stân .  
0,1315 daz sie ire venje pflege .  
0,1316 unde sich gote ergebe .  
0,1317 ire site unde ire gewoneheit .  
0,1318 die sage ich iu gereite .  
0,1319 alle morgene vile vruo .  
0,1320 sô gedâhte sie dâr zuo .  
0,1321 daz sie ire gebetes hûete .  
0,1322 diu reine unde diu guote .  
0,1323 mit michelme vlîze .  
0,1324 unze zuo dem inbîze .  
0,1325 sô die vrouwen geâzen .  
0,1326 unde wider an ire werke gesâzen .  
0,1327 den half sie unze an die nône  
0,1328 sô gie sie abe schône  
0,1329 hin vûre den altære .  
0,1330 daz sie ire saltær lêre .  
0,1331 dâ stuont sie unze an die vesper .  
0,1332 daz alle die swester .  
0,1333 daz gesanc an viengen .  
0,1334 unde ire tagezît begiengen .  
0,1335 sô kom gevlogen Gabrîël .  
0,1336 der gotesengel vile hêre .  
0,1337 er brâhte ouch ir daz himelbrôt .  
0,1338 daz der juncvrouwen bôt .  
0,1339 daz nôz sie mit kiuschem lîbe .  
0,1340 diu nie wart ze wîbe .  
0,1341 anders âze sie niht vile .  
0,1342 als ich iuch bewîsen wile .  
0,1343 swaz man ir gap ze spîse .  
0,1344 daz îlte diu maget wîse .  
0,1345 den armen ellenden .  
0,1346 in die stat senden .  
0,1347 al der . vrouwen samenunge .  
0,1348 beidiu alte unde junge .

0,1349 di wurden dô wole inne .  
0,1350 der tougenlîchen minne .  
0,1351 die sie mit dem engel habete .  
0,1352 sie selbe ez wole verdagete .  
0,1353 doch was ez unverborgen .  
0,1354 daz en mahte sie niht besorgen .  
0,1355 seligen swester woneten dô .  
0,1356 in Salomonis templô .  
0,1357 die wâren dâ gehoehet .  
0,1358 nû sint sie gar zestoeret .  
0,1359 sît habent ez besezzen .  
0,1360 rîtær vile vermezzen .  
0,1361 die ez werent mit krefte .  
0,1362 vore der heidenschefte .  
0,1363 mit den was diu maget reine .  
0,1364 alsô daz sie stæte scheine .  
0,1365 ze aller slahte arbeit .  
0,1366 die sie ze gewoneheit .  
0,1367 hæten gesprochen under in .  
0,1368 niemannd mahte den ire sin .  
0,1369 errechen noch ergründen .  
0,1370 sie manete sie ze allen stunten .  
0,1371 werben nâch gote hulde .  
0,1372 sie was âne alle schulde .  
0,1373 guot . wolegemuot milte unde wîse .  
0,1374 sie lebet der hêren spîse .  
0,1375 die ir der engel brâhte .  
0,1376 necheines arges sie gedâhte .  
0,1377 kiusche . diemuot . unde stæte .  
0,1378 die drî tugende sie hæte .  
0,1379 mit den andern ûz erkoren .  
0,1380 nît . hôchvart . unde wîplich zorn .  
0,1381 vant an ir necheine stat .  
0,1382 wande nie vrouwe sô hôhe getratt .  
0,1383 ze sælden unde ze êren gelîche .  
0,1384 des ist hiute ire lop sô rîche .  
0,1385 die zuht sie umbe gurte .  
0,1386 vluochen unde boese antwürte .  
0,1387 muoste ir sîn unerkant .  
0,1388 sie was âne der sünden bande .  
0,1389 vasten oder wachen .  
0,1390 daz en mahte sie niht gemachen .  
0,1391 missevar noch trûebe .  
0,1392 des wunderet genuoge .  
0,1393 alle ire hûsgeôzinne .  
0,1394 die starkete sie in der minne .  
0,1395 daz sie die übermüete .  
0,1396 ersluogen mit der güete .

0,1397 unde allez unreht vermiten .  
0,1398 ze alsô lûterlîchen sîten .  
0,1399 kêrte sie diu sûeze .  
0,1400 nû bitet sie daz sie uns müeze .  
0,1401 wider kêren von den sünden .  
0,1402 unde an ire minne erzünden .  
0,1403 nie wart sô wole sprechender man .  
0,1404 der ie von buochen sin gewan .  
0,1405 daz ez tohte im einen .  
0,1406 ze sprechen von der reinen .  
0,1407 volliclîche nâch ire wirdicheit .  
0,1408 an die got sînen vlîz leite .  
0,1409 als er sie gemaheln wolte .  
0,1410 unde bî ir bûwen scholte .  
0,1411 eines sites sie dô begunde .  
0,1412 den weder wîp noch man kunde .  
0,1413 noch vore ire gebûrte ie vernam .  
0,1414 swanne ez alsô kam .  
0,1415 daz sie iemannd grûezene  
0,1416 unde sie daz gelten muoste .  
0,1417 sô genâdet sie gote zehant .  
0,1418 der ire heil sô hête gewant .  
0,1419 daz ir diu werlte zuo sprach .  
0,1420 semfte wort dâ si ez an sach .  
0,1421 swâ sie aber den gruoosal .  
0,1422 scholte bieten überal .  
0,1423 sie bat herziclîchen .  
0,1424 daz sie got genædiclîchen .  
0,1425 an der rede meinte .  
0,1426 unde guoten âbent bescheinte .  
0,1427 oder sæligen morgen .  
0,1428 den liuten die mit sorgen .  
0,1429 in der werlte bûwent .  
0,1430 unde im iedoeh getrûwent .  
0,1431 danne kom uns diu gewoneheit .  
0,1432 daz wir beidiu liep und leit .  
0,1433 ûf sîn genâde schulen ergeben .  
0,1434 von dem wir hân daz leben .  
0,1435 gelernet wir hân dâ bî .  
0,1436 swer sô uns grûezenes sî .  
0,1437 daz wir im alsô schône .  
0,1438 wûnschen daz got ez lône .  
0,1439 und dem irdischem schîne .  
0,1440 der êren verzîhe .  
0,1441 si diente gote âne wanc .  
0,1442 unde hête einen gedanc .  
0,1443 ob sie ze vile redete .  
0,1444 daz ez lîhte ir schadete .

0,1445 unde daz sie vore urspriche .  
0,1446 an ire muote verwandelte sich .  
0,1447 iz en wære vile nütze .  
0,1448 sie liez ire anlütze .  
0,1449 vile selten erlachen .  
0,1450 man jach ir an allen sachen .  
0,1451 ie der tugende bezzisten .  
0,1452 die begunden ouch asten .  
0,1453 unde vile wîten umbe vâhen .  
0,1454 di siechen die sie ersâhen .  
0,1455 unde sie an geruorten .  
0,1456 die kraft sie danne vuorten .  
0,1457 daz sie niht mêre swar .  
0,1458 dâr umbe kêrten si dâr .  
0,1459 wande sie dâ genâde vunden .  
0,1460 nû ruoche sie unser wunden .  
0,1461 bedecken mit ire güete .  
0,1462 daz wir ûz der gotes huote  
0,1463 iemer komen sô verre .  
0,1464 daz uns des tiuvels gewalt iht werre .  
0,1465 dô sie wahsen begunde .  
0,1466 dô wart sie in kurzer stunte .  
0,1467 an dem hâre unde an der lîch .  
0,1468 über alliu wîp sô wætlîche .  
0,1469 daz ein hêrre hiez Abiathar .  
0,1470 der wânte sînen muot dâr  
0,1471 wie er die maget gewünne .  
0,1472 sînem lieben sune ze wünne .  
0,1473 der vile kindische man .  
0,1474 der was ouch ir genôzsam .  
0,1475 der hêrlîche degen .  
0,1476 gerte sie mit bete erwegen .  
0,1477 daz sie in ruochte minnen  
0,1478 durch erben gedingen .  
0,1479 der ê hête er hin ze ir gedâht .  
0,1480 doch wart diu rede niht volbrâht  
0,1481 wande diu vrouwe des niht verdolete .  
0,1482 sie sprach daz sie niene wolte .  
0,1483 iemer man gerüeren .  
0,1484 daz werltlîche ungevüere .  
0,1485 dûhte sie sô kumberrîche .  
0,1486 daz sie gerne vrîlîche .  
0,1487 lebet âne mannes gebende .  
0,1488 unze an des lîbes ende .  
0,1489 got eine hæte sie erwelt .  
0,1490 dem si lîp mit sêle sêlt .  
0,1491 daz sie wære sîn diuw . unde sîn brût .  
0,1492 er beidiu ire hêrre . unde ire trûte .

0,1493 diu antwürte was ungemach .  
0,1494 dem bitel . unde gesprach .  
0,1495 alle sîn genôze .  
0,1496 er bôt in miete grôze .  
0,1497 die des tĒmpels pflâgen .  
0,1498 daz sie niht scholte betragen .  
0,1499 sie nemen die maget guote .  
0,1500 von dem swærem muote .  
0,1501 den sie ir habete vüre gesetzt .  
0,1502 dâr umbe gehiez er unde bat .  
0,1503 er bôt in golt daz rôte .  
0,1504 und dingete vile genôte .  
0,1505 mit dem silber wîzeme .  
0,1506 daz sie im hulfen mit vlîze .  
0,1507 umbe daz kint . des er gert .  
0,1508 daz ir sîn sun würde gewert .  
0,1509 nâch rehte ze êlichen dingen .  
0,1510 diu miete began in gelingen .  
0,1511 dô rieten sie algelîche .  
0,1512 unde schünden grôzlîche .  
0,1513 daz diu vrouwe tete  
0,1514 swes sie der hêrre bæte .  
0,1515 dô sprach sente Marîe .  
0,1516 got hête erzündet sie .  
0,1517 mit reinerndem muote .  
0,1518 in engelischer huote .  
0,1519 “wes müejet ir iuch hêrre mîn .  
0,1520 lât ditze unbescheidenes spil sîn .  
0,1521 wande ich niemer man gewinne .  
0,1522 ze werltlîcher minne .  
0,1523 ir ne schulet mich niht reizen .  
0,1524 jâ hân ich gote entheizen .  
0,1525 mîn sêle unbewollen .  
0,1526 mac ich daz ervollen .  
0,1527 daz ist der bezziste rât .  
0,1528 dâ mîn gedinge an stât .”  
0,1529 dô was ein bischof under in .  
0,1530 der was sîn vlîzic durch den gewin .  
0,1531 er sprach “vrouwe lâ die rede stân .  
0,1532 ich sage dir wie ez ist getân .  
0,1533 umbe die rehten wârheit .  
0,1534 als uns diu buoch hânt geseit .  
0,1535 diu êwe ist gote liep unde genæme .  
0,1536 wan er selbe Adâme .  
0,1537 vrouwen – gap ze wîbe .  
0,1538 wæren wir von ire lîbe .  
0,1539 alle niht ersprungen .  
0,1540 beidiu alte unde junge .

0,1541 sô wære diu werlte oede .  
0,1542 kranc . ringe unde broede .  
0,1543 sô ne ruofte niemannd an got .  
0,1544 vrouwe lâ varn dînen . spot .  
0,1545 nim den man ze êwe .  
0,1546 dazze iz dir ze sælden ergê .  
0,1547 volge uns âne widerstrît .  
0,1548 wan dir got sînen segen gât .  
0,1549 unde vrôuwede mit lieben kinden .  
0,1550 an den solt dû heil vinden .  
0,1551 daz dû mit den reinen .  
0,1552 sîn êre müezest meinen .  
0,1553 daz ist der bezziste rât .  
0,1554 der von mannes sinne gât  
0,1555 unde des wir megen erdenken .  
0,1556 nû solt dû uns an der bete niht wenken .”  
0,1557 des entwurte im abe dô .  
0,1558 Rosa in Jericho .  
0,1559 diu maget alsô lieht .  
0,1560 “ich en volge iuwer nieht .  
0,1561 ir saget mir von Adâme .  
0,1562 daz er – neme .  
0,1563 – von der gotes hende .  
0,1564 daz tet er âne wende .  
0,1565 doch genôz mêre Abel der guot .  
0,1566 daz er beleip an kiuschem muote .  
0,1567 dô er daz opfer vûre truoc .  
0,1568 unde in sîn bruoder sluoc .  
0,1569 denne ob er gemeiligt wære  
0,1570 vore sînem schepfære .  
0,1571 got îlte im geben ze lône .  
0,1572 zwô güldîne krône .  
0,1573 von der marter eine .  
0,1574 die ander daz er reine .  
0,1575 und unbewollen was .  
0,1576 daz ist dâ er mit genas .  
0,1577 – der gotes man .  
0,1578 als ich ez vernomen hân .  
0,1579 der wart ze himel gevüeret .  
0,1580 durh daz er unberüeret .  
0,1581 was von allem meile .  
0,1582 im wart getân ze teile .  
0,1583 diu genâde diu iemer stât .  
0,1584 dâ mit uns got erzeiget hât .  
0,1585 daz er die kiusche .  
0,1586 mit der liechten goteheit .  
0,1587 gerne wile under stôzen .  
0,1588 nû hât er vrôuwede grôze .

0,1589 unde êren vile . erworben .  
0,1590 swie der lîp ist noch unerstorben .  
0,1591 des ruochet iuwer bete lân .  
0,1592 wande mîn muot ist sô getân .  
0,1593 daz ich stæte belîben schol .  
0,1594 got der weiz mîn herze wole .  
0,1595 mîn ahte . unde mînen willen .  
0,1596 daz . ir êr mahtes billen .  
0,1597 wazzer ûz dem steine .  
0,1598 êr daz ich dechein broede meine .”  
0,1599 zehande sie sich viengen .  
0,1600 von der rede sie giengen .  
0,1601 an dem kindischen wîbe .  
0,1602 hêten sie daz ze nîde .  
0,1603 daz sie was alsô veste .  
0,1604 dâr umbe zurnten al die geste .  
0,1605 sie vuoren als sie tobeten .  
0,1606 ein teidinc sie gelobeten .  
0,1607 sie gebuten ein gesende .  
0,1608 daz sie kômen an ein ende .  
0,1609 ob – diu mære .  
0,1610 sô ungevolgic wære .  
0,1611 der gesprochen tac .  
0,1612 an einer hôchzîte gelac .  
0,1613 dô kom michel menige dâr .  
0,1614 der bischov hiez Abiathar .  
0,1615 der gruozte sie an der porte .  
0,1616 mit dem gotesworte .  
0,1617 er stuont ûf einere grêde .  
0,1618 unde huop ûf sîn hende beide .  
0,1619 gegen dem himelischen sal .  
0,1620 eine stille gebôt er überal .  
0,1621 er sprach “nû hoeret alle  
0,1622 wie iu daz gevalle .  
0,1623 daz – diu schoene tuot .  
0,1624 niemannd ist sô edel noch sô guot .  
0,1625 sô rîche noch sô tiure .  
0,1626 daz er ir gezeme hiure .  
0,1627 swer ir ze wîbe gert .  
0,1628 der scheidet dannen geungewert .  
0,1629 si ne trûejet niht genesen .  
0,1630 si ne müeze maget wesen .  
0,1631 wir haben vrouwen vile gezogen .  
0,1632 künige tochter unde herzogen .  
0,1633 der hêrlîchen slahte .  
0,1634 daz uns nie decheiniu in der ahte .  
0,1635 alsô vile ie gemuote .  
0,1636 und iedoch vile grôzer güete .

0,1637 ze rede wâren worden .  
0,1638 von allen ire vordern  
0,1639 daz ist ein michel herte .  
0,1640 des guoten Aaronis gerte .  
0,1641 der manen ich alle dise diete .  
0,1642 wie er den grôzen strît schiet .  
0,1643 dô die gotes êwewarte .  
0,1644 under im zewurfen harte .  
0,1645 diu gerte wart wider grüne .  
0,1646 begunde louben unde blüejē .  
0,1647 in der heiligen arke .  
0,1648 got der mac noch sam starke .  
0,1649 sîne tougen erzeigen .  
0,1650 diu werlt ist sîn eigen .  
0,1651 der mennische sîn hantgetât .  
0,1652 an im reht unde genâde stât .  
0,1653 daz bedenket alle wole .  
0,1654 ich sage iu wie nû tuon schol .  
0,1655 disiu menige algemeine .  
0,1656 daz got die wârheit bescheine .  
0,1657 unde sînen willen dâ bî .  
0,1658 die von êlichem bande vrî .  
0,1659 sîn komen an den tac hiute .  
0,1660 der iegelicher vore dem liute .  
0,1661 bringe morgen sîn gerte .  
0,1662 der got der sie gewerte .  
0,1663 bî Aaronis zîten .  
0,1664 nû wir sîner genâden biten .  
0,1665 der lâze uns werden schîn .  
0,1666 wes – brût schule sîn .  
0,1667 unde erzeige mit gewelte .  
0,1668 wer ir von sîner gebe walte .”  
0,1669 michel wart dô der schal .  
0,1670 der rât geviel in überal .  
0,1671 dô jâhen sie gemeinliche .  
0,1672 diu rede wære lobeliche .  
0,1673 sie behielten gerne sîn gebot .  
0,1674 unde dingeten hin ze gote .  
0,1675 die dâ wâren ungehîwet  
0,1676 daz er schiede selbe den strît .  
0,1677 diu naht dûhte sie ze lanc .  
0,1678 unde hêten manigen gedanc .  
0,1679 umbe die maget wolegetâne .  
0,1680 wer si ze wîbe solte hân .  
0,1681 wande sie al der werlte behagete .  
0,1682 dô ez des morgenes tagete .  
0,1683 der bischov nam dechein vriste .  
0,1684 er kom ze vordereste .

0,1685 die rîche unde die junge .  
0,1686 vaste zuo im drungen .  
0,1687 wole gebadet wole gekleit .  
0,1688 als daz wære lieht seit .  
0,1689 grôzliche was ire geverte .  
0,1690 sie brâhten schoene gerte .  
0,1691 lange unde slehte .  
0,1692 dô markte vile rehte .  
0,1693 allermannegelîche die sîne .  
0,1694 unde wânte der megede gewert sîn .  
0,1695 ir iegelîcher hât es wân .  
0,1696 doch solte ez anders ergân .  
0,1697 die armen umbesæzen .  
0,1698 die getorsten niht verlâzen .  
0,1699 die ledige liute wâren .  
0,1700 si ne muosen gebâren .  
0,1701 als man in von hove gebôt .  
0,1702 dô kom durch die selben nôt .  
0,1703 ûf den tac ein grîse man .  
0,1704 sô harte vorhte er den ban .  
0,1705 Josepch was er genant .  
0,1706 der ist uns ouch wole erkant .  
0,1707 sô wir an den buochen .  
0,1708 sînen namen wellen suoehen .  
0,1709 der was ein witewære .  
0,1710 alter . guot . unde gewære .  
0,1711 broede sînes lîbes .  
0,1712 der en gerte niht wîbes .  
0,1713 er brâhte ein kleinez gertelîn .  
0,1714 durch die gehôrsame sîn .  
0,1715 daz rîs alsô kurze .  
0,1716 daz hête er ab der wurze .  
0,1717 gezerret harte unwæhe .  
0,1718 daz diu werlt dâ bî sehe .  
0,1719 sîn gemüete niene stân .  
0,1720 nâch vrôuweden . noch ûf liebes wâne .  
0,1721 die gerte gâben sie ze hove .  
0,1722 die entvienc der bischov .  
0,1723 unde garte sich in die hêren wât .  
0,1724 ze himele suoehet er den rât .  
0,1725 dô gienc er alsô schoene .  
0,1726 zuo dem tische vrôneme .  
0,1727 daz er dâ ervûnde .  
0,1728 sô er verrest kunde .  
0,1729 ob dem altære .  
0,1730 waz gotes wille wære .  
0,1731 nû vernâmet alle besunder .  
0,1732 diu manicvaltigen wunder .

0,1733 diu got der diête zeiget .  
0,1734 diu ire gemüete . neiget .  
0,1735 under sîne meisterschaft .  
0,1736 dô der bischov vore der lantschaft .  
0,1737 ze himele huop sîne hende .  
0,1738 dô nam ez guot ende .  
0,1739 mit zaheren was er begozzen .  
0,1740 sîn herze wole beslozzen .  
0,1741 in der wâren minne .  
0,1742 dô kom diu gotes stimme .  
0,1743 sie sprach “ich wile dich gewern .  
0,1744 unde ouch dise menige niht entwern .  
0,1745 des sie mich gebeten hât .  
0,1746 mir ist gelîcht dîn rât .  
0,1747 nû habe daz in dîner ahte .  
0,1748 daz dû die gerten hînaht .  
0,1749 zuo dem heilictuome ruowen legest .  
0,1750 unze sie morgen wider gebest .  
0,1751 sô zeige ich iu den man sô guoten .  
0,1752 der – schol behüeten .  
0,1753 dem ich die êre hân beschert .  
0,1754 ein tûbe von sînem stabe vert .  
0,1755 diu hebet sich ze der grûfte .  
0,1756 und swinget sich in diu lufte .  
0,1757 daz sie niemannd mac gesehen .  
0,1758 dem scholte ir alle des jehen .  
0,1759 daz er die maget sûeze .  
0,1760 vore iu gemaheln müeze .  
0,1761 daz sages dû dem liute .  
0,1762 daz ich daz wile unde gebiute .”  
0,1763 nû rûeget iuch alle dâ mite .  
0,1764 daz got die süntigen site .  
0,1765 an uns sô harte schiuhet .  
0,1766 daz uns sîn stimme vliuhet .  
0,1767 diu unser vordern ofte erschein .  
0,1768 wan des ist zwîvel nechein .  
0,1769 dô von dem bischove here .  
0,1770 eroffenet wart diu lêre .  
0,1771 die er gote mit diemuot an gewan .  
0,1772 dô vrôuwet sich wîp unde manne .  
0,1773 und als der morgenrôt .  
0,1774 der vinstern erde licht erbôt .  
0,1775 daz al diu werlte erlûhte .  
0,1776 die menige dô zît dûhte .  
0,1777 daz sie ze hove giengen .  
0,1778 ire gerte wider entviengen .  
0,1779 ze êreste gap man den rîchen .  
0,1780 den der armer müeze entwîchen .

0,1781 unde dâr nâch den smâhen .  
0,1782 sie sprâchen swâ sie sâhen .  
0,1783 daz zeichen mit den ougen .  
0,1784 daz wolten sie gelouben .  
0,1785 Josephes gerte diu kleine .  
0,1786 diu was vervallen eine .  
0,1787 von den andern sie geslief .  
0,1788 daz sie der bischov niht begreif .  
0,1789 dô wânten sie algemeine .  
0,1790 nû in daz zeichen niht erscheine .  
0,1791 ez kome von ire sünden .  
0,1792 daz got wære erwunden .  
0,1793 sîner grôzen barmunge .  
0,1794 sie wanten herze unde zunge .  
0,1795 diemüeticlîche an in .  
0,1796 daz in diu tûbe erschîne .  
0,1797 diu in dâ was geheizen .  
0,1798 sie rûwe daz sie gemeizen .  
0,1799 die schoenen gerte hæten .  
0,1800 nû ruoche er sie berâten .  
0,1801 der al die werlte wîset .  
0,1802 und sîn wârheit brîset .  
0,1803 mit rehte unde mit güete .  
0,1804 der gevröuwe ire gemüete .  
0,1805 jâ erschameten sich di vürsten .  
0,1806 der vrevêl daz sie getorsten .  
0,1807 dâr gebieten ir gerte .  
0,1808 si erkanten ir herte .  
0,1809 unde klageten ir missetât .  
0,1810 daz sie in hôchvertiger wât .  
0,1811 gotes tougene . wolten sehen .  
0,1812 daz mit diemuot muoz geschehen .  
0,1813 Josepch der gotes trûte .  
0,1814 der vlôch die rede und die brût .  
0,1815 er dûhte sich sô nidere .  
0,1816 daz er niene wolte widere .  
0,1817 sîn kleine gerte entwâhen .  
0,1818 dô si dô niht en sâhen .  
0,1819 sie sprâchen mit einem munde .  
0,1820 “wir schulen des himels urkünde .  
0,1821 noch herziclîche suochen .  
0,1822 ob des got welle ruochen .  
0,1823 daz wir gesehen sîne tougene .  
0,1824 er ist genædic daz ist unlougen .”  
0,1825 Abiathar der bischov .  
0,1826 der hiez dô ûf den vrîthov .  
0,1827 alle die menige entwîchen .  
0,1828 unde beten inniclîchen .

0,1829 eine gienc er in den sal .  
0,1830 daz liut stuont hier vore überal .  
0,1831 selbe garte er sich sâ .  
0,1832 in zweliv tintinnabulâ .  
0,1833 unde in die heiligen wât .  
0,1834 die Moses geprüevet hât .  
0,1835 niht von mennischen sinne .  
0,1836 wan als im diu gotesminne .  
0,1837 gebôt unde vore tihtete .  
0,1838 als sich der hêrre berihte .  
0,1839 got ze vlêhen in dem gewande .  
0,1840 erwelte mirren er brante .  
0,1841 – unde wîrouch .  
0,1842 sîn sünde weinte er ouch .  
0,1843 sô heize vore dem altære .  
0,1844 daz des himels rihtære .  
0,1845 geruochte bewîsen in .  
0,1846 der beidiu genâde unde sin .  
0,1847 al der werlte teilet .  
0,1848 unde die süntære heilet .  
0,1849 swâ er die riuwe gesihet .  
0,1850 wande im der barmunge jihet .  
0,1851 ensament himel unde erde .  
0,1852 unde dienen im sô werde .  
0,1853 dô kom ein engel gevlogen .  
0,1854 er sprach “jâ sît ir niht betrogen .  
0,1855 got en wandelt niht sîniu wort .  
0,1856 nû suoche ein kleine gerte dort .  
0,1857 diu dir ist entvallen .  
0,1858 diu kumet ze vröuweden in allen .  
0,1859 swie harte sie iu versmâhet .  
0,1860 als sie Josepch entvæhet .  
0,1861 ir gesehet diu gotes tougene .  
0,1862 mit vleischlîchen ougen .”  
0,1863 dô er die kleinen ruote .  
0,1864 allenhalben suochte .  
0,1865 in der arke er sie vant .  
0,1866 er nam sie vroelîche in die hant .  
0,1867 dô – dranc er ûz der kirchtüre .  
0,1868 unde zeigte die gerte her vüre .  
0,1869 er sprach “Josepch gotes kint .  
0,1870 die engel dir genædic sint .  
0,1871 sie îlent an dich zeigen .  
0,1872 disiu gerte ist dîn eigen .  
0,1873 nû sûme dich niht mêre .  
0,1874 wir bevelhen dir die maget hêre .”  
0,1875 Josepch erkom dô harte .  
0,1876 daz mit sô lûtem worte .

0,1877 der bischov in an rief .  
0,1878 sîn gedanke wâren tief .  
0,1879 er zwîvelt waz er tete  
0,1880 unde wes got willen hæte .  
0,1881 doch entvienc er daz rîs .  
0,1882 sîn bart was im lanc und grîs .  
0,1883 weinen begunde er durch nôt .  
0,1884 unde als er die ûf bôt .  
0,1885 vore wîben unde vore mannen .  
0,1886 ein tûbe swanc dô dannen .  
0,1887 ein vogel sô wole getân .  
0,1888 daz sîn got muoste êre hân .  
0,1889 der sweimet ein wîle dâ .  
0,1890 und huop sich dâ nâch sâ .  
0,1891 gegen himel hin wider .  
0,1892 danne er komen was her nider .  
0,1893 dô wart ein kradementiger schal .  
0,1894 von dem liute überal .  
0,1895 sie lobeten got genôte .  
0,1896 wie harte sie wunderen .  
0,1897 daz en kan iu niemannd gesagen .  
0,1898 er eine muose wole klagen .  
0,1899 daz er in alten zîten .  
0,1900 des kindes scholete biten .  
0,1901 ein herze er gevienc .  
0,1902 vüre den bischov er gie .  
0,1903 unde leinte sich über sîn krukên .  
0,1904 er bat sîn got gehügen .  
0,1905 daz sie in alle liezen .  
0,1906 sînes alters geniezen .  
0,1907 und in des niht en dwungen .  
0,1908 daz er die maget junge .  
0,1909 in sînen gewalt neme .  
0,1910 er sprach wie er ir gezeme .  
0,1911 dô trôsten in die hêrren .  
0,1912 im en mahte niht gewerren .  
0,1913 wâr umbe er trûren scholte .  
0,1914 swaz got stiften wolte .  
0,1915 daz mahte im niht widerstân .  
0,1916 wolte aber er des strîtes niene lân .  
0,1917 des muoz er wole entkelten .  
0,1918 sie hêten vereischet selten .  
0,1919 swer wider dem garte .  
0,1920 wære strebente harte .  
0,1921 ez en kome im ze ungemache .  
0,1922 Josepch in aber zuo sprach .  
0,1923 “swære ist mir iuwer gebot .  
0,1924 des beget mich durch got .

0,1925 wande ich ir unwirdic bin .  
 0,1926 ich en hân die jugent noch den sin .  
 0,1927 daz ich ir wole gedienen müge .  
 0,1928 diu in sô grôzer pflege .  
 0,1929 komen ist an disen tac .  
 0,1930 got weiz wole daz ich en mac .  
 0,1931 nû sehet mîn unkraft an .”  
 0,1932 der bischov entwürten began .  
 0,1933 er bat in ein wîle hoeren .  
 0,1934 er sprach “unde wilt dû stoeren .  
 0,1935 daz dir der engel gebôt .  
 0,1936 daz ist der êwige tôt .  
 0,1937 dâ mit muost dû verloren sîn .  
 0,1938 jâ zeiget dir daz magedîn .  
 0,1939 des himels urkünde .  
 0,1940 unde wilt dû âne sünde .  
 0,1941 sament ir iemer bûwen .  
 0,1942 in gotelîchen triuwen .  
 0,1943 sô maht dû wole genesen .  
 0,1944 unde maht des hûses wirt unde meister wesen .  
 0,1945 schaffe ez dâr inne swie dû wellest .  
 0,1946 daz dû uns dîn alter zelest .  
 0,1947 daz gevrumet dir kleine .  
 0,1948 niemannd weiz wan got eine .  
 0,1949 wes er habe an dich gedâht .  
 0,1950 dô er die tûben brâhte .  
 0,1951 er wesse wole wer dû wære .  
 0,1952 sîn lôz daz ist gewære .  
 0,1953 sîn urkünde wârhaft .  
 0,1954 nû geswîge dîner unkraft .  
 0,1955 unde gedenke wole dâr an .  
 0,1956 wie zwêne hêrlîche . manne .  
 0,1957 Dathanen unde Abiron .  
 0,1958 wîlent verworhten ire lôn .  
 0,1959 daz sie an die gotes tougene .  
 0,1960 niht wolten gelouben .  
 0,1961 nû mache die rede niht ze lanc .  
 0,1962 lâ den strît . volge uns âne wanc .  
 0,1963 gemehel mit vroelîchem muote .  
 0,1964 die maget edel unde guot .  
 0,1965 êr wir den hov rûmen .  
 0,1966 dû solt uns niht langer sûmen .”  
 0,1967 dô sprach der einvalte  
 0,1968 “got mit sînem gewalte .  
 0,1969 der bewîse mich des bezzisten .  
 0,1970 wan swie sô ich weste .  
 0,1971 daz ich die sêle mahte ernesen .  
 0,1972 waz scholte ich tiurers gerne .

0,1973 ich wile iu sagen mînen sin .  
0,1974 wande ich ein süntære bin .  
0,1975 alt unde ouch ungezæme .  
0,1976 waz hülfe mich daz ob ich sie neme .  
0,1977 ez ist umbe mich nechein vrume .  
0,1978 ich hân abe êrlîche süne .  
0,1979 vile wole getâne degene .  
0,1980 die mir got gesegene .  
0,1981 die sint guot unde wole geborenen .  
0,1982 ze allen sælden erkoren .  
0,1983 an die wile ich ir râten .  
0,1984 und wile ez vore iu stâten .  
0,1985 daz ich ir mit bescheidener rede .  
0,1986 mînen gemahelschatze gebe .  
0,1987 sô sie ze ire jâren bekome .  
0,1988 unde in mînem hûse gewone .  
0,1989 sô schouwe sie alliu diu kint .  
0,1990 diu mir von gote verlihen sint .  
0,1991 an swelichem mînem kinde .  
0,1992 sie die tugende vinde  
0,1993 daz ez ir wole gevalle .  
0,1994 daz dienen wir alle .  
0,1995 daz sie zuo dem kêre  
0,1996 des mac sie vrume unde êre .  
0,1997 baz denne an mir gewinnen .  
0,1998 daz ist ouch al diu minne .  
0,1999 der ich iemer dâr gemuote .  
0,2000 alsus entvâhe ich sie in mîne huote .”  
0,2001 als diu rede was getân .  
0,2002 die hêrren hiezen . gân .  
0,2003 nâch sante Marîen .  
0,2004 der guoten unde der vrîen .  
0,2005 die ladeten sie ûf den vrîthov .  
0,2006 sie sprâchen daz der bischov .  
0,2007 sie wolte gesprechen .  
0,2008 ire êre gerne zechen .  
0,2009 die vrouwen die ir wâren bî .  
0,2010 nû ez alsô komen sî .  
0,2011 die rieten ir al gelîche .  
0,2012 daz sie tete vroelîche .  
0,2013 swes man an sie muote .  
0,2014 daz würde ir gewant ze guote .  
0,2015 ûf stuont dô diu reine .  
0,2016 sie gie zühticlîche unde seine .  
0,2017 den hêrren bî sîten .  
0,2018 vüre die hêrschaft an den rinc wîten .  
0,2019 unde bevalch sich gote tiure .  
0,2020 sie sprach “hêrre dû mich stiure .

0,2021 mit dem hêren geiste dîn .  
 0,2022 daz mîn antwürte müeze sîn .  
 0,2023 werde unde unbesprochenlîche .”  
 0,2024 dô gebôt der bischov rîche .  
 0,2025 al die menige swîgen .  
 0,2026 unnützen kradem vermîden .  
 0,2027 die maget entvienc er wole .  
 0,2028 sie neic im als ein vrouwe schol .  
 0,2029 dâ stuont sie sam diu bluome .  
 0,2030 diu an ander wise grüne .  
 0,2031 ire liechten schînen verre sprenget .  
 0,2032 die werlt hête des wole verhenget .  
 0,2033 daz diu rede gelenget wære .  
 0,2034 dâr umbe wande diu werde unde diu mære .  
 0,2035 gap in vrôuwede unde ougenweide .  
 0,2036 die sælde hête sie beide .  
 0,2037 an der schoene unde an der güete .  
 0,2038 dâr under stuont ab ire gemüete .  
 0,2039 niender mê wan eine ze gote .  
 0,2040 unde ze al sîn gebote .  
 0,2041 der hêrre huop an unde sprach .  
 0,2042 “vrouwe dîn êre unde dîn gemach .  
 0,2043 wellen wir mit dir ahten .  
 0,2044 nû solt dû reine betrachten .  
 0,2045 waz gotes wille dâr an sî .  
 0,2046 unde ouch unser rât dâ bî .  
 0,2047 daz zeichen daz dâ geschehen ist .  
 0,2048 daz wile daz dû necheine vrist .  
 0,2049 noch dechein ûfschup habest .  
 0,2050 unde dich niht langer entsagest .  
 0,2051 dû ne werdest hier ze stete .  
 0,2052 durch unser aller bete .  
 0,2053 Josephes gemahle .”  
 0,2054 dô vielen ir die trahene .  
 0,2055 ab den hiufeln an die wât .  
 0,2056 sie sprâchen “sîn ist dechein rât .  
 0,2057 wer schol daz wenden unde klagen .  
 0,2058 daz got selbe ruochet an tragen .  
 0,2059 der an niemanndn missetuot .  
 0,2060 nû sage vrouwe dînen muot .”  
 0,2061 diu maget entwürten began .  
 0,2062 “got der den êresten man .  
 0,2063 ûz leime gebiledet hât .  
 0,2064 unde des – in deme himele stât .  
 0,2065 der ouch geschuof den wîten umbekreiz .  
 0,2066 alliu dinc er wole weiz .  
 0,2067 wir mügen in nihtes verheltn .  
 0,2068 niht versagen noch versteln .

0,2069 aller herzen tougene .  
 0,2070 diu sint vore sînen ougen .  
 0,2071 des tiefen meres unde .  
 0,2072 joch daz vinsten apgründe .  
 0,2073 erde unde lufte sint im dienesthaft .  
 0,2074 unde erkennenet sîne kraft .  
 0,2075 der ruoche mich erhoeren .  
 0,2076 sîn gebot schol ich niht stoeren .  
 0,2077 wande ich daz urkunde .  
 0,2078 von sîn selbes munde .  
 0,2079 entvengen hân unde nemen wile .  
 0,2080 hier ist ouch hêrscheft vile .  
 0,2081 der beidiu bete unde rât .  
 0,2082 von rehte mir ze volgen stât .  
 0,2083 swie ich doch niemer gewinne .  
 0,2084 muot ze werltlicher minne .  
 0,2085 daz ich mit decheinem meile .  
 0,2086 mîn sêle verteile .  
 0,2087 noch mînen magettuom verwerte .  
 0,2088 ich sach abe der gerte .  
 0,2089 mitsament iu die tûben vliegen .  
 0,2090 des wile ich niht triegen .  
 0,2091 daz himelische bouchen .  
 0,2092 mîn herze muoz ich brouchen .  
 0,2093 in iuwer aller râte .  
 0,2094 swer mich ze helfe bestatet .  
 0,2095 dem bin ich gerne undertân .  
 0,2096 mit dieneste daz wizzet sunder wân .  
 0,2097 mînes lîbes ich niemanndn gan .  
 0,2098 dâ belîbe ich stætich an .  
 0,2099 ob mir ez got verzîhet .  
 0,2100 der niemanndn nihtes verzîhet .  
 0,2101 des man mit rehte an in gert .  
 0,2102 dâ wurde ouch ich niht entwert .”  
 0,2103 diu rede dûhte lobelich .  
 0,2104 des jach allermannegelicheit .  
 0,2105 diu antwûrte diu wære guot .  
 0,2106 ire sin mit wîsheit behûetet .  
 0,2107 dô hête in sînem gewalte .  
 0,2108 einen gemahelschatze der alte .  
 0,2109 ein güldîn vingerlîn .  
 0,2110 daz entvienc sie von der hant sîn .  
 0,2111 enmitten in deme ringe .  
 0,2112 daz volc an dem teidinge .  
 0,2113 vore vröuweden singen began .  
 0,2114 sie wolten kêren danne .  
 0,2115 ze herbergen rîten .  
 0,2116 der alte beit sie biten .

0,2117 er sprach “nû scholte ich mîn venje .  
0,2118 vüre alle dise . menige .  
0,2119 vile billichen suochen .  
0,2120 ob ir ez woltes geruochen .  
0,2121 die hêren die nû hier sint .  
0,2122 die sehent wole daz ich ditze kint .  
0,2123 selbe niht mac bewarn .  
0,2124 jâ muoz ich rîten unde varn .  
0,2125 durch mîne sache wîten .  
0,2126 wie mahte danne erbîten .  
0,2127 disiu maget schoene .  
0,2128 unze ich ie wider kome .  
0,2129 si ne wære mit ire gespilen .  
0,2130 anders muoste sie bevilen .  
0,2131 unde betragen mîner ûzverte .  
0,2132 nû helfet mir daz ich beherte .  
0,2133 mit bete ir ze huote .  
0,2134 vünve juncvrouwen guote .  
0,2135 kiusche . gewizzen unde biderbe° .  
0,2136 die geantwürte ich iu widere .  
0,2137 swenne ir sîn niht wellt entbern .  
0,2138 des schol mich der bischov gewern .  
0,2139 durch iuwer aller minne .  
0,2140 sô bin ich wole gestiuret hinnen .”  
0,2141 dô sprâchen die guoten knehte .  
0,2142 wan scholte in von rehte .  
0,2143 gewern swaz er bâte .  
0,2144 nû er in gevolget hæte .  
0,2145 sie hiezen die küniginne .  
0,2146 selbe welen dâr inne .  
0,2147 dô nam sie die liebsten under in .  
0,2148 hin ze den sie truoc ire sîn  
0,2149 einiu was Rachel genant .  
0,2150 der alle tugende wâren erkant .  
0,2151 diu ander Rebekka hiez .  
0,2152 die nechein guottæte verliez .  
0,2153 Sephora was diu dritte .  
0,2154 diu hête reine site .  
0,2155 Abigea hiez diu vierde .  
0,2156 diu lebete âne alle giredede .  
0,2157 werltlichen sünden .  
0,2158 unde gienc ungebunden .  
0,2159 wande sie ir hête vüre geleit .  
0,2160 ze belîben mit der kiuscheheit .  
0,2161 die vünften nante man Susanne .  
0,2162 diu muoste ir volgen danne .  
0,2163 michel wart daz weinen .  
0,2164 dô ez kâme an daz scheiden .

0,2165 überal die samenunge .  
0,2166 diu – schidunge .  
0,2167 tet in herziclichen wê .  
0,2168 sie sprâchen daz sie niemer mê .  
0,2169 die reinen überwunden .  
0,2170 noch ir gelîche vunden .  
0,2171 über allez irdische tal .  
0,2172 die vrouwen kuste sie überal .  
0,2173 daz insigel rehter güete .  
0,2174 ire zuhtn gehal ire gemüete .  
0,2175 daz ire gesinde ouch urloup nam .  
0,2176 als ez den megeden gezam .  
0,2177 mit zühtclîcher süeze .  
0,2178 zuo des bischoves gruoze .  
0,2179 – dannoch getrat .  
0,2180 urloubes sie in gebat .  
0,2181 daz er ir gebieten scholte .  
0,2182 die hêrren hêten sie holde .  
0,2183 die wünscheten ir al gelîche .  
0,2184 sælde und vrôuwede rîche .  
0,2185 daz sie die hier gewünne .  
0,2186 unde her nâch des himels wünne .  
0,2187 sie neic in . unde kêrte danne .  
0,2188 mit den vrouwen . joch mit dem manne .  
0,2189 der sie wole bewarn kunde .  
0,2190 unde ez ouch meinet âne sünde .  
0,2191 sie vüere über daz gevilde .  
0,2192 in engelischem bilede .  
0,2193 ze sînen herbergen .  
0,2194 wie mahte iemer werden .  
0,2195 lobelîcher geverte .  
0,2196 wande sie got beidiu gewerte .  
0,2197 sîner hulde . unde al der êren .  
0,2198 nû ruoche . sie zuo uns kêren .  
0,2199 sîn genâde den sie truoc .  
0,2200 wile sie . sô hân wir heiles genuoc .  
0,2201 ein stat heizet Kapharnaum .  
0,2202 diu stoezet an des meres drum .  
0,2203 dâ sâzen rîche liute .  
0,2204 Kapharnaum quiut ze diute .  
0,2205 villa speciosa .  
0,2206 sie lûhte sam diu rôse .  
0,2207 ob anderen steten .  
0,2208 dâr wart Josepch gebeten .  
0,2209 von rîchen vürsten zwein .  
0,2210 des wâren sie worden enein .  
0,2211 daz ir ietweder nâch im sante .  
0,2212 jâ was ez in sînem lande .

0,2213 ire schif wâren in zebrosten .  
0,2214 daz kunde er wole kosten .  
0,2215 waz sie dâr ûf tæten .  
0,2216 sô verre sie in bâten .  
0,2217 daz er in muoste volgen .  
0,2218 doch was sîn herze erbolgen .  
0,2219 daz er nâch solichen êren .  
0,2220 von sînem hûse scholte kêren .  
0,2221 iedoch muoste er hengen .  
0,2222 er ne mahte ez niht gelengen .  
0,2223 an dem andern morgene .  
0,2224 huop er sich ûz mit sorgen .  
0,2225 der heilige patriarche  
0,2226 die megede pflæget er starke .  
0,2227 daz sie an – huote .  
0,2228 stæte weren durch ire güete .  
0,2229 nahtes bî ir lægen .  
0,2230 mit triuwen ir pflægen .  
0,2231 sîn hîwische hiez er vûre sich gân .  
0,2232 unde gebôt daz sie undertân .  
0,2233 sîner vrouwen wæren .  
0,2234 unde allez daz verbæren .  
0,2235 daz sie leides ermanete .  
0,2236 sîn süne bat er ouch zehant .  
0,2237 in ir dieneste gerne stân .  
0,2238 “nû muoz ich iuch” sprach er “lân .  
0,2239 die wîle ich bin underwegen .  
0,2240 der milte gotes segen .  
0,2241 habe iuch alle in sîner huote .”  
0,2242 dô schiet er danne mit trûrigem muote .  
0,3162 dô bôt er sich drâte .  
0,3163 unser vrouwen ze vuozen .  
0,3164 er sprach “wie wole mir müezen .  
0,3165 mîn sünde stân ze riuwe .  
0,3166 daz ich die missetriuwe .  
0,3167 ûf dînen lîp ie gewan .  
0,3168 umbe dechein irdischen man .  
0,3169 der engel mich bewîst hât .  
0,3170 wie ez umbe dich vrouwe stât .  
0,3171 dû bist ein insigele .  
0,3172 des keisers ûz dem himele .  
0,3173 der dich hât gemahet .  
0,3174 durch aller süntære nôt .”  
0,3175 diu meit sich vröuwen began .  
0,3176 ire sælde die sach sie an .  
0,3177 sie wesse wole die genâde vrône .  
0,3178 dô neic sie im alsô schoene .  
0,3179 der sie geschuof ze den êren .

0,3180 an sîn lop begunde sie kêren .  
0,3181 beidiu zunge unde ire sinne .  
0,3182 sie sprach “jâ mac diu gotesminne .  
0,3183 an mir wole volbringen .  
0,3184 als ich hân gedingen .  
0,3185 swaz er gebiutet unde wile .  
0,3186 er gît mir mandunge vile .”  
0,3187 die zuo der rede quâmen .  
0,3188 dô si daz wunder vernâmen .  
0,3189 starke lobeten sie den heilant .  
0,3190 der sîne zeswen hant .  
0,3191 hête gerihte über sie .  
0,3192 grôzer vrôuwede diu wart nie .  
0,3193 under einem gesinde .  
0,3194 von der muoter unde dem kinde .  
0,3195 diu rîchen niuwe mære .  
0,3196 die muosen sie vüre wære .  
0,3197 vore grôzer liebe beweinen .  
0,3198 alsô wâren sie ungescheiden .  
0,3199 daz mære dô vedere gewan  
0,3200 von der vrouwen wolegetân .  
0,3201 wîten vuor ez ze gazzen .  
0,3202 die juden viengen ze hazze .  
0,3203 diu ungewonlîchen wort .  
0,3204 umbe den himelischen hort .  
0,3205 den diu reine maget truoc .  
0,3206 iz dûhte sie ungevüege genuoc .  
0,3207 wande ez êr nie wart vernomen .  
0,3208 zesamen wâren sie komen .  
0,3209 dô hiezen sie behalten .  
0,3210 die vrouwen unde den alten .  
0,3211 unze an den andern morgen .  
0,3212 des sie dâ hêten sorgen .  
0,3213 daz wære in geschadet niht .  
0,3214 ob sie hæten wîstuomes iht .  
0,3215 die tumben êwewarte .  
0,3216 die erkomen harte .  
0,3217 von der rede dô sie erschal .  
0,3218 unde diu judenschaft überal .  
0,3219 die bischove und die rihtære .  
0,3220 verviengen sie mit swære .  
0,3221 daz sie die maget hêre .  
0,3222 rafsten alsô sêre .  
0,3223 sunderen hiezen si ez dô .  
0,3224 in ire nîtlîchem conciliô .  
0,3225 einhalben stuont des himels brût .  
0,3226 anderhalben der gotestrût .  
0,3227 vüre geleit wart in beiden .

0,3228 von dem volke unbescheiden .  
0,3229 manic vreise unde zorn .  
0,3230 wie sie muosen sîn verloren .  
0,3231 ob sie decheiner sünden .  
0,3232 wurden überwunden .  
0,3233 sie begunden sie an vehten .  
0,3234 daz von ire unrehte .  
0,3235 diu êwe wære zebrochen .  
0,3236 daz würde wole errochen .  
0,3237 ob sie vore ire geslehte .  
0,3238 gerihten niene mahte .  
0,3239 sie satzte in vêrlîchen vûre .  
0,3240 die angestlîchen selpkûre .  
0,3241 ez hête in sînem gebote .  
0,3242 Moses gevestenet von gote .  
0,3243 die an der êwe missetâten .  
0,3244 welich buoze sie dâ von hæten .  
0,3245 daz in daz gerihte gemeine .  
0,3246 erteilte die steine .  
0,3247 unde den swæren tût mit schanden .  
0,3248 von steinwerfenden handen .  
0,3249 daz leiten sie in vûre durch nît .  
0,3250 den der tiuvel den sînen gît .  
0,3251 die im underhoeric sint .  
0,3252 unde die vore übele werdent blint .  
0,3253 an der güete unde der wârheit .  
0,3254 diu tugentrîche meit .  
0,3255 ervorhte ir ze nihte daz .  
0,3256 sie trôste ie baz unde baz .  
0,3257 ire reines herzen stæte .  
0,3258 swie genôte ir diu diet tete .  
0,3259 Josepch sîn unschulde bôt .  
0,3260 er ne wart nie bleich noch rôt .  
0,3261 von necheiner slahte vorhten .  
0,3262 die juden alle daz markten .  
0,3263 daz sie beidiu stæticlîchen .  
0,3264 vore armen unde vore rîchen .  
0,3265 ire unschulde jâhen .  
0,3266 swie sie die bernde wambe sâhen .  
0,3267 si hêten eine gewoneheit .  
0,3268 diu was den schuldigen leit .  
0,3269 ein urteile vreissam .  
0,3270 ire alter vater Abrahamen .  
0,3271 und ire herzoge Moses .  
0,3272 die bewîsten sie des .  
0,3273 daz sie des wazzers ünde .  
0,3274 alsô gesegenen kunden .  
0,3275 unde alsô tiefe beswern .

0,3276 daz sie niemannd mahte ernern  
0,3277 die schuldige dâr kâmen .  
0,3278 unde daz tranc genâmen  
0,3279 mit leide muosen die beligen .  
0,3280 die von schulden wurden bezigen .  
0,3281 ofte geschach swer iz tranc .  
0,3282 daz im diu huf ûz spranc .  
0,3283 im sprungen ûz joch diu ougen .  
0,3284 swer dâ wolte lougenen .  
0,3285 sîner missetæte .  
0,3286 die er begangen hæte .  
0,3287 genuoge lâgen dâ tût .  
0,3288 durch des wazzers nôt .  
0,3289 sie vorhten ez alle ensament .  
0,3290 jâ was diu urteile genamet .  
0,3291 ein wazzer zelotipiê .  
0,3292 den schuldigen tet sie wê .  
0,3293 nû dröuwten sie unser vrouwen .  
0,3294 sie wolten dâr an schouwen .  
0,3295 wer der man wære .  
0,3296 bî dem sie kint gebere .  
0,3297 sie dröuwten ouch Josephe .  
0,3298 ze vorder an der grêde .  
0,3299 wolte er schiere niht jehen .  
0,3300 er muose jâmer sehen .  
0,3301 ane sîn selbes lîbes .  
0,3302 sie vrâgeten ob er ze wîbe .  
0,3303 hête gewonnen die maget .  
0,3304 der hêre was unverzaget .  
0,3305 er sprach vile genendicliche .  
0,3306 “daz wizze got der rîche .  
0,3307 daz ich sîn niht hân getân .  
0,3308 noch nie willen gewan .  
0,3309 daz kint ich nie geruorte .  
0,3310 doch ich sie heim vuorte .  
0,3311 ir wizzet wole wes ich gedâhte .  
0,3312 dô man mir ez zuo brâhte .  
0,3313 ze Kapharnaum was ich gevarn .  
0,3314 dâ muose ich ander dinc bewarn .  
0,3315 dô ich kom wider heim .  
0,3316 disiu sorge mir erschein .  
0,3317 die ir nû selbe kieset .  
0,3318 und ist daz ir mich nû verlieset .  
0,3319 got mac die sêle behalten .  
0,3320 unde ruoche des lîbes walten .”  
0,3321 die ersteinte juden .  
0,3322 die unser vrouwen an lügen .  
0,3323 unde ire êre vuorten veile .

0,3324 die îlten die urteile .  
0,3325 segenen mit vlîze .  
0,3326 daz sie die itewîze .  
0,3327 muosen dâ bewæren .  
0,3328 mit wûlvînen gebâren .  
0,3329 reizete sie algemeine .  
0,3330 der nît ûf die vile reine .  
0,3331 dô der brunne was gereit .  
0,3332 Josepch als daz buoch seit .  
0,3333 der gerte necheiner vriste .  
0,3334 wande in got selbe wiste .  
0,3335 er dranc âne sorgen dâr vûre .  
0,3336 er ne vorhte niht daz er verlûr .  
0,3337 den lîp oder sîn êre .  
0,3338 er gedâhte . an die lêre .  
0,3339 die im der engel zuo sprach .  
0,3340 dô er in jungeste sach .  
0,3341 diu vröuwte sînen gedanc .  
0,3342 dô huop er ûf und transc .  
0,3343 vroelîche vore in allen .  
0,3344 sie wânten in nider vallen .  
0,3345 unde verderben dâ ze stete .  
0,3346 iedoch got genædiclîcher tete .  
0,3347 der die sîne niemer verlât .  
0,3348 und in an den noeten bî gestât .  
0,3349 dô stuont er âne wende .  
0,3350 sie vuorten in bî der hantn .  
0,3351 umbe den altære siben stunte .  
0,3352 dannen schiet er wolegesunt .  
0,3353 daz nechein urkûnde .  
0,3354 lügenlîcher sünde .  
0,3355 an im wart ervunden .  
0,3356 sô genas er vore den hunden .  
0,3357 nû gêt ez an unser vrouwen .  
0,3358 dâ mahte man wole schouwen .  
0,3359 spilentiougen . vrîn muot .  
0,3360 von gote was sie sô behüetet .  
0,3361 enmitten in deme kreize .  
0,3362 diu scheltwort als heize .  
0,3363 diu wâren ir sam daz touwe .  
0,3364 wande sie daz unreht nie geruowe .  
0,3365 daz sie mit iemanndn ie begie .  
0,3366 joch den willen gewan sie nie .  
0,3367 der bischof redet sament ir .  
0,3368 “die schulde kiesen wir .  
0,3369 an dîn selbes lîbe .  
0,3370 sage an wer dich ze wîbe .  
0,3371 mit schanden habe gemachet .

0,3372 des dîn ouge lachet .  
0,3373 des mahtest dû baz weinen .  
0,3374 dû wirdest ze teile den steinen .  
0,3375 die muost dû vore uns lîden .  
0,3376 wande sie diu êwe solichen wîben .  
0,3377 erteilet an den buochen .  
0,3378 dû maht uns niht versuochen .  
0,3379 mit valsclîchem lougene .  
0,3380 daz dû hâst gevrumet tougen .  
0,3381 daz schînet an dir ze wâre .  
0,3382 dîn reht hilfet dir undâre .”  
0,3383 diu maget began entwûrten .  
0,3384 mit semftlîchen worten .  
0,3385 jâ hête sie die zunge .  
0,3386 in sîeze rede bedwungen  
0,3387 sie sprach . “ich en hân des niht getân .  
0,3388 daz ich habe tôdes wân .  
0,3389 got weiz mîn unschulde .  
0,3390 unde hân ich sîne hulde .  
0,3391 sô muoz mîn rât werden .  
0,3392 er ne lât mich niht erwerden .  
0,3393 hân abe ich gesündet .  
0,3394 daz ich sô bin erzündet .  
0,3395 mit werltlîchem viure .  
0,3396 sîn genâde ist sô tiure .  
0,3397 daz er ez wole mac erzeugen .  
0,3398 swer sich ze sünden wile neigen .  
0,3399 der ne darf den valsclîchen sin .  
0,3400 niht verlâzen an in .  
0,3401 sich selben er betrûege .  
0,3402 swer mit im dechein lûge .  
0,3403 gedæhte beherten .  
0,3404 er ne lie mich nie verwerten .  
0,3405 von iemanndes unzûhten .  
0,3406 daz wile ich hier gerihten  
0,3407 allem disem gesinde .  
0,3408 diu urteile ist mir linde .  
0,3409 wande die mich hiute hier sehent .  
0,3410 her nâch sie des jehent .  
0,3411 daz got der starker sî .”  
0,3412 daz wazzer daz stuont ir bî .  
0,3413 nû huop sie ûf unde tranc .  
0,3414 ane strîtlîchen wanc .  
0,3415 sô vile daz sie des jâhen .  
0,3416 die daz gerihte sâhen .  
0,3417 daz si es alle genuoc dûhte .  
0,3418 ire antlûtze ir dô lûhte .  
0,3419 michels baz denne êr .

0,3420 ez en tet ir niender wê .  
0,3421 sie ne liezen sie niht gestên .  
0,3422 sie ne muose siben stunte gên  
0,3423 umbe den altære .  
0,3424 dô erzeigeten ire gebære .  
0,3425 daz sie niht entswær .  
0,3426 und ir ouch arges niene wær .  
0,3427 dô begâben sie ez alle .  
0,3428 mit leide joch ire sêle valle .  
0,3429 daz sie die liep gotes brût .  
0,3430 erbelget hæten überlût .  
0,3431 leide sâhen in die hêren  
0,3432 unde vûrhten in ze gewerren .  
0,3433 daz sie die maget hêre .  
0,3434 gemuoten ie sô sêre .  
0,3435 unde sie ze ihte hêten getriben .  
0,3436 dô sie an allen ire lîden .  
0,3437 ganze was bestanten .  
0,3438 swie sie doch erkanten .  
0,3439 daz sie truoc daz kindelîn .  
0,3440 von wanne daz mohte sîn .  
0,3441 des nâmen sie grôz wunder .  
0,3442 diu reine gedâhte dâr under .  
0,3443 wie sie von dem teidinge .  
0,3444 ire ganze êre scholte bringen .  
0,3445 jâ vorhte sie die vertâne  
0,3446 daz sie mit boesem arcwâne .  
0,3447 dannoch vuorten ire haz .  
0,3448 rihten wolte sie baz .  
0,3449 dô swâr sie den grimmigen liuten .  
0,3450 bî allen gotes trûten .  
0,3451 die ze himel hêten reste .  
0,3452 in der gotelîchen veste .  
0,3453 dâ nie ouge gesach .  
0,3454 sorgen noch ungemach .  
0,3455 von decheiner unkrefte .  
0,3456 sie swar bî der hêrschefte .  
0,3457 die got vater selbe hât .  
0,3458 ze des gebote stât .  
0,3459 der liehte sunne . unde der mâne .  
0,3460 daz sie valsches âne .  
0,3461 an allen zwîvel wære .  
0,3462 der werke unde der gebære .  
0,3463 und ire lîbes bürde .  
0,3464 nie bequikt würde .  
0,3465 von decheines mannes gelfe .  
0,3466 “got” sprach sie “mir sô hilfe .  
0,3467 an deme jungesten urteile .”

0,3468 dô jâhen sie mit heile .  
0,3469 sie wolten si es verwizzen .  
0,3470 mit dieneste sie sich vliezen .  
0,3471 daz sie ze ire hulden kâmen .  
0,3472 unde ir die swære benâmen .  
0,3473 di sie hæten ir getân .  
0,3474 mit rede unde mit boesem wâne .  
0,3475 diu guote sancte Marîe .  
0,3476 diu von sünden vrî .  
0,3477 und iemer unberüeret .  
0,3478 wart wider gevuort .  
0,3479 in ire eigen herberge .  
0,3480 sus hête diu gotes werde .  
0,3481 mit der zeswen ire kindes .  
0,3482 des übeln ingesindes .  
0,3483 niet wole überwunden .  
0,3484 die rehte gedenken kunden .  
0,3485 die sprâchen daz daz selbe dinc .  
0,3486 über allen irdischen rinc .  
0,3487 muose her nâch erschellen .  
0,3488 unde mohte Israel wole gevellen .  
0,3489 ein keiser was bî den zîten .  
0,3490 ein gewaltiger voget wîten .  
0,3491 – was er genamet .  
0,3492 der hête diu rîche alliu ensament .  
0,3493 in sînen gewalt bedwungen .  
0,3494 diu tâten unde sungên .  
0,3495 swaz er eine gebôt .  
0,3496 nû vordert er daz golt rôten .  
0,3497 von aller werlte gelîche .  
0,3498 von allen steten unde allen rîche .  
0,3499 von iegelîchem lande .  
0,3500 silber wîze wole gebrante .  
0,3501 zinses wolte er niht entbern .  
0,3502 niemannd getorste in entwern .  
0,3503 swes sîn wille wart enein .  
0,3504 in sô grôzen êren er schein .  
0,3505 dô diu niuwe hêrschaft erschâl .  
0,3506 über berge und über tal .  
0,3507 daz gebote muose ergân .  
0,3508 âne widerstrît unde sunder wân .  
0,3509 daz ahten die rihtære .  
0,3510 von Rôme diu sô mêre .  
0,3511 dannoch was unde sô hêre .  
0,3512 nû ist sie genideret sêre .  
0,3513 ein lantgrâve hiez Cyrîn .  
0,3514 von Syria . dem lande sîn .  
0,3515 eines buoches der began .

0,3516 dâ setzete er die juden an .  
0,3517 unde schuof die wirte an schrîben .  
0,3518 unde di liute dâ zuo trîben .  
0,3519 daz sie an die krône dæhten .  
0,3520 und ir urkünde bræhten .  
0,3521 an dem gelobeten zîte .  
0,3522 über die lantschaft wîte .  
0,3523 niemannd was sô mehtic .  
0,3524 sô rîche noch sô ahtic  
0,3525 er ne muose den zins geben .  
0,3526 den vrône hort erheben .  
0,3527 unde den kamerschatze mêren .  
0,3528 dem rîchen keiser ze êren .  
0,3529 die dâ ûz wâren gevarn .  
0,3530 die îlten heim daz bewarn .  
0,3531 daz sie iht belîben .  
0,3532 si ne wurden an geschriben .  
0,3533 zuo ire künne unde ire mâgen .  
0,3534 dâ si ouch daz silber gâben .  
0,3535 daz drî pfenninge wac .  
0,3536 sô ez ûf der wâge gelac .  
0,3537 daz gap ein iegelich man .  
0,3538 der daz leben wolte hân .  
0,3539 die sich begunden weren .  
0,3540 die ersluogen die schergen .  
0,3541 die daz gelt entviengen .  
0,3542 unde vore die vürsten giengen .  
0,3543 mit zinslîchem horde .  
0,3544 sie brâhten in sînem worte .  
0,3545 grôze güldîne sûle .  
0,3546 unde geladene mûle .  
0,3547 unde wagene alsô veste .  
0,3548 die daz gesmîde bezziste . –[...]  
0,3549 dô wart ein kreftiger vride .  
0,3550 diu swert versluogen die smide .  
0,3551 beidiu spieze unde sper .  
0,3552 dô ne was dechein her .  
0,3553 daz ietweder des gedæhte .  
0,3554 daz ez strîte oder vehthe .  
0,3555 dô ne was niht urliuge .  
0,3556 bî des meres biuge .  
0,3557 noch en nechein nîtgeshelle .  
0,3558 mit grôzer ebenhelle .  
0,3559 unde harte vridelîche .  
0,3560 stuonden alliu rîche .  
0,3561 diu semfte unde diu stille .  
0,3562 diu was des kindes wille .  
0,3563 daz bî der megede was verholen .

0,3564 daz man begunde zollen .  
0,3565 die breiten werlt allîche .  
0,3566 unde sich lôste mannegelîche .  
0,3567 mit gewæge drîer pfenninge .  
0,3568 daz sint als ich gedinge .  
0,3569 die vile hêren namen drî .  
0,3570 die uns machent vrî .  
0,3571 von des vîndes bande .  
0,3572 unde sellent uns sîner hande .  
0,3573 der ein keiser ist der wære .  
0,3574 himels und der erde ze wære .  
0,3575 michel reht . was daz .  
0,3576 dô er nâchwentic was .  
0,3577 daz stætes vrides würde .  
0,3578 und die schalclîchen bûrde .  
0,3579 abe muosen slîfen .  
0,3580 diu rebe began dô rîfen .  
0,3581 dâ wir den wîntrûben .  
0,3582 scholten abe klubben .  
0,3583 danne uns vlôz daz wizzôt .  
0,3584 daz den êwigen tô .  
0,3585 zevuorte unde genâde tuot .  
0,3586 daz ist daz sîn hêre bluot .  
0,3587 an dem lebentigen buoche .  
0,3588 schrîben er uns geruoche .  
0,3589 an sîner holden stat .  
0,3590 dâ er di rehten hât gesetzet .  
0,3591 die sich des werent mit sünden .  
0,3592 die sint sêre gebunden .  
0,3593 unde verliesent ouch daz leben .  
0,3594 sô mahten wir gerner geben .  
0,3595 den zins den drîn genennen .  
0,3596 got der kan wole erkennen .  
0,3597 ob wir in rehte meinen .  
0,3598 sô wir die broede under neigen .  
0,3599 dô der zins was gesamenet .  
0,3600 als ez der keiser gebôt .  
0,3601 unde daz ûf geleit wart .  
0,3602 swer sich dâr an niht bewart  
0,3603 daz er daz gelübede ervulte .  
0,3604 der vrevel er entgûlte .  
0,3605 unde muose daz houbet verliesen .  
0,3606 Josepch begunde kiesen .  
0,3607 unde gedenken in sîner ahte .  
0,3608 wâr er kêren mahte .  
0,3609 dâ er würde zinshaft .  
0,3610 dô bewîste in gotes kraft .  
0,3611 daz er ze Bêthlêhêm scholte .

0,3612 wande Krist dâ erschînen wolte .  
0,3613 dô ne bitete er niene mêre .  
0,3614 er sprach ze der megede hêre .  
0,3615 “dise rede mac niht langer gestân .  
0,3616 daz unser genôze hât getân .  
0,3617 daz schulen ouch wir tuon ze wâre  
0,3618 wande ez uns schaden gebere .  
0,3619 ob wir ez übersitzen .  
0,3620 unde des gebotes vergezzen .  
0,3621 nû solt dû vrouwe . gehügen .  
0,3622 wâr wir jêrlîchen mûgen .  
0,3623 unsern houbetzins bringen .  
0,3624 daz wir âne vreise gedingen .  
0,3625 dâ ze der rihtære geinwürte .”  
0,3626 diu maget im dô entwurte .  
0,3627 “des en darf dû niht vrâgen .  
0,3628 unser vriunt unde unser magen .  
0,3629 die sint von Bêthlêhêmen komen .  
0,3630 dâ schulen wir jêrlîche wonen .  
0,3631 mit der selben urteile .  
0,3632 die in die burgere ze heile .  
0,3633 und ze rehte wel sprechen .  
0,3634 wie scholten wir die zebrechen .  
0,3635 sinnes schulen wir walten .  
0,3636 unde unser êwe behalten .  
0,3637 êr man uns des lîbes roube .  
0,3638 vile wole ich daz geloube .  
0,3639 daz ich bî mînem geslehte .  
0,3640 missetuon niene mahte .”  
0,3641 Josephe geviel diu rede wole .  
0,3642 er sprach . “wie gerne ich dir volgen schol  
0,3643 mich dunket daz wir ze harte .  
0,3644 haben gelenget dise varte .  
0,3645 sîn wære volliclîchen zît .”  
0,3646 dô kêrte diu niftel Dâvîds .  
0,3647 gein Bêthlêhêmen die strâze .  
0,3648 sie wolte sich brieven lâzen .  
0,3649 vröuwede unde wünne .  
0,3650 –[...]  
0,3651 muose ir dâ begebenen .  
0,3652 von des kindes segene .  
0,3653 sie vuor dâr vroelîche .  
0,3654 ir dienten williclîche .  
0,3655 der engel gesinde guot .  
0,3656 von den was sie wole behüetet .  
0,3657 der himelische vater guoter .  
0,3658 der wolte dô sîne muoter .  
0,3659 kûmftiger dinge .

0,3660 an ein ende bringen .  
0,3661 ein grôze tougene .  
0,3662 diu sante er ir ze ougen .  
0,3663 die anders niemannd sach .  
0,3664 wande sie di schame nie zebrach .  
0,3665 magetlicher güete  
0,3666 und in der kiusche bluote .  
0,3667 bî dem wege sach sie stân .  
0,3668 beidiu wîp unde man .  
0,3669 ietwederhalben ze den sîten .  
0,3670 engegen ir sô wîten .  
0,3671 ein volc und ein schar .  
0,3672 diu kom vile trûriclichen dâr .  
0,3673 die wunden die hende .  
0,3674 in îsenîne gebende .  
0,3675 wâren sie geslozzen .  
0,3676 mit zaheren begozzen .  
0,3677 sie klageten unmâze .  
0,3678 anderhalben der strâze .  
0,3679 stüende ein schar tugentliche .  
0,3680 harte vröuwedenrîche .  
0,3681 lieht und sicher vore leide .  
0,3682 sie hêten volle weide .  
0,3683 wünniclichiu spil .  
0,3684 alles liebes unde êren vile .  
0,3685 sie wâren schône gekleit .  
0,3686 in wîzer wæte gemeit .  
0,3687 Josephe sie dô sagete .  
0,3688 waz sie gesehen habete .  
0,3689 von den zwein scharen .  
0,3690 der liechten unde der missevaren .  
0,3691 daz geloubet er trâge .  
0,3692 unde enttwalte mit der vrâge .  
0,3693 wie dem dinge mohte sîn .  
0,3694 des erschamete sich diu küniginne .  
0,3695 dô sie daz mære verlie .  
0,3696 ûf dem wege sie ergie .  
0,3697 ein knappe schoene âne bart .  
0,3698 ir geverte er dô wart .  
0,3699 daz was ein kint lustsam .  
0,3700 als ez von rehte gezam .  
0,3701 dem gesinde vore gote .  
0,3702 daz ze sînem gebote .  
0,3703 iemer stât unde iemer vert .  
0,3704 wan ez vüre in niht liebes gert .  
0,3705 in dem bilede erschein er .  
0,3706 sam er der liute wære einer .  
0,3707 die ze Bêthlêhêm wolten .

0,3708 unde dâ zinsen scholten .  
0,3709 des selben hêten sie wân .  
0,3710 unde sâhen in gerne mit in gân .  
0,3711 dô tâten sie rede genuoge .  
0,3712 alsô sûeze unde gevüege .  
0,3713 von der nâhenten hêrschaft .  
0,3714 von gotes güete unde sîner kraft .  
0,3715 ire herze wâren reine .  
0,3716 in rehter minne gemeine .  
0,3717 dô sprach der jungelinc .  
0,3718 “ich hôrte wole daz teidinc .  
0,3719 daz êr was under iu .  
0,3720 dô ich kom gegangen zuo iu .  
0,3721 von den gewaltigen tougenen .  
0,3722 diu mahte Josepch wole gelouben .  
0,3723 daz sîn sin vremedelîche stât .  
0,3724 ze den dingen die got hât .  
0,3725 ûf dem wege bescheint  
0,3726 daz en weiz ich waz meinet .  
0,3727 Josepch hoere her ze mir .  
0,3728 die wârheit sage ich dir .  
0,3729 ze diute an disen stunten .  
0,3730 die die hende sô wunden .  
0,3731 unde angestliche gebârten .  
0,3732 die habent die wîngarten .  
0,3733 gotes niht erbowen .  
0,3734 daz muoz sie balde riuwen .  
0,3735 daz ist diu jûdische diet .  
0,3736 diu die wîssagen verriet .  
0,3737 die in dâ wâren gesant .  
0,3738 von des oberesten hant .  
0,3739 die habent vile grimmigez muot .  
0,3740 daz vile unschuldige bluot .  
0,3741 daz ist hin ze in gerunnen .  
0,3742 sie sint dem hirte enttrunnen .  
0,3743 mit dem si genesen scholten .  
0,3744 ob si ez dienen wolten .  
0,3745 ir übele hât in verteilet .  
0,3746 des gênt sie geseilet .  
0,3747 mit – viurînen banden .  
0,3748 in noeten unde grôzen schanden .  
0,3749 sint sie iemer bestricket .  
0,3750 ire êre diu ist genicket .  
0,3751 unde berihte sich niemere .  
0,3752 des klageten sie alsô sêre .  
0,3753 die anderhalben dâ vrôuwede hânt .  
0,3754 unde in liechter wâte stânt .  
0,3755 daz sint die bekêrte .

0,3756 die got wîlent êrten .  
0,3757 die entvâhent nû gotes sun .  
0,3758 der in sîn genâde wile tuon .  
0,3759 die belîbent niht ze der winster .  
0,3760 sie gâhent von der vinsten .  
0,3761 in die liechten sunne .  
0,3762 unde badent sich ûz dem brunne .  
0,3763 dâ allez meil verswindet .  
0,3764 unde sie der geist entbindet .  
0,3765 von tôtlichem gebende .  
0,3766 der juden missewende .  
0,3767 diu wirdet der heidenschefte trôst .  
0,3768 der tiuvel gerwet sînen rost .  
0,3769 dâ er die verworhten .  
0,3770 entvæhet die gotesvorhten .  
0,3771 niene wel lernen .”  
0,3772 Josepch der hôrte gerne .  
0,3773 daz er im die rede sô beschiet .  
0,3774 die israhêlischen diete .  
0,3775 die began er weinen heize .  
0,3776 daz sie Abrahames geheize .  
0,3777 alsô scholten verliesen .  
0,3778 unde den êwigen tôt kiesien .  
0,3779 bedaz diu rede was getân .  
0,3780 der âbent begunde ane gân .  
0,3781 diu sunne nider sîgen .  
0,3782 diu naht den tac vertriben .  
0,3783 als in dô gesweich daz licht .  
0,3784 Josepch der getrûwete nicht .  
0,3785 volkumen an die stat .  
0,3786 unser vrouwen er gebat .  
0,3787 daz sie geruochte underwegen .  
0,3788 ane ein bette sich gelegen .  
0,3789 unze an den andern morgen .  
0,3790 dô dwungen sie die sorgen .  
0,3791 daz ire meitwesender lîp .  
0,3792 wole erkante sîne zît .  
0,3793 sie sprach “swie spâte ez uns werde .  
0,3794 wir ne schulen die herberge .  
0,3795 anderswâ niender suochen .  
0,3796 wile sîn got geruochen .  
0,3797 wan in Dâvides bürge .  
0,3798 vile lîhte ez uns schade würde .  
0,3799 scholten wir anders iener sîn .  
0,3800 ervult sint die tage mân .  
0,3801 daz ich muoter werden schol .  
0,3802 daz ist in mîner ahte wole .  
0,3803 ich bringe den gewaltigen wirt .

0,3804 den sîn eigen diu gebiret .  
0,3805 als er mir hêre gebôt .  
0,3806 volvarn muoz ich durch die nôt .”  
0,3807 als ez umbe mittenacht wart .  
0,3808 dô gap der megede învart .  
0,3809 Bêthlehême ire gruoosal .  
0,3810 dô ne mahte ouch diu ire zal .  
0,3811 niht langer haben vrist .  
0,3812 der voregewîssagete Krist .  
0,3813 wolte selbe dô zeigen .  
0,3814 daz sich der himel neigen .  
0,3815 scholte zuo der – erde .  
0,3816 dô in gebar diu werde .  
0,3817 diu vrouwe enttwelen muose .  
0,3818 bî einer smæhen klûse .  
0,3819 diu himelische porte .  
0,3820 die got mit sînem worte .  
0,3821 erwelte uns ze heile .  
0,3822 diu gesach in einem steine .  
0,3823 ein vile wênigez loch .  
0,3824 ire wille sie dâr getruoc .  
0,3825 daz sie dâr in trat .  
0,3826 unde sich dâ hête gesetzet .  
0,3827 daz en kom niht von geschichte .  
0,3828 daz sie in alrihte .  
0,3829 in dem vinsteren hole .  
0,3830 scholte riuwen sô wole .  
0,3831 di Kristes predigære .  
0,3832 die hêten vore manigem jâre .  
0,3833 vore geschriben unde gesaget .  
0,3834 wie diu muoter unde maget .  
0,3835 alsô scholte gebern .  
0,3836 unde uns des hêren gewern .  
0,3837 der ze vogete würde gezalt .  
0,3838 vûre des tiuvels gewalt .  
0,3839 dô sie gie in den stein  
0,3840 dô lûhte unde erschein .  
0,3841 ein michel licht dâr inne .  
0,3842 gegen der kûninginne .  
0,3843 die wîle daz sie dâ beleip .  
0,3844 die vinstre daz licht vertreip .  
0,3845 sam dâ ein viur brünne .  
0,3846 oder diu berhtel sunne .  
0,3847 vertribe daz genibele .  
0,3848 ûz dem ir gesidele .  
0,3849 sie gebôt dem manne zehande .  
0,3850 daz er sînen vlîz wante  
0,3851 hebeammen ze bringen .

0,3852 die sie in ire dingen .  
0,3853 wole bewaren kunden .  
0,3854 die hête er schiere vunden .  
0,3855 Rachel hiez diu eine  
0,3856 diu gâhete zuo dem steine .  
0,3857 Salome dâ mite gie .  
0,3858 der hêrre sie niht verlie .  
0,3859 unze er sie brâhte an die stat .  
0,3860 als diu vrouwe gebat .  
0,3861 Josepch der alte .  
0,3862 der vile invalte .  
0,3863 der semfte . und der guote .  
0,3864 vile lützel in daz müejete .  
0,3865 daz er daz allez an truoc .  
0,3866 wan swes diu vrouwe ie gewuoc .  
0,3867 unde swar sie in wolte senden .  
0,3868 daz kunde er wole verenden .  
0,3869 dô er underwegen was .  
0,3870 dô kom diu zît . daz sie genas .  
0,3871 diu geburt samfte ergie .  
0,3872 wan sie in âne meil entvienc .  
0,3873 unde âne sünde gebar .  
0,3874 von rehte ire leides niene was .  
0,3875 ir wâren die engele bî .  
0,3876 die tâten sie sorgen vrî .  
0,3877 dô sie brâhte den heilant .  
0,3878 der diu irdischen lant .  
0,3879 uns ze heile wolte schouwen .  
0,3880 jâ ne was ouch bî der vrouwen .  
0,3881 nechein werltlîcher lîp .  
0,3882 entweder man noch wîp .  
0,3883 wirdic was des niemannd .  
0,3884 dâ die engele scholten dienen .  
0,3885 dem gotelîchem geslehte .  
0,3886 wir hoeren an der hêren nahte .  
0,3887 grôz êre der werlte künden .  
0,3888 doch mügen wir ez niht ergründen .  
0,3889 jâ ist sîn tûsent stunte mê .  
0,3890 denne dâ geschriben stê .  
0,3891 daz grôze wuofen unde klagen .  
0,3892 daz andere vrouwen müezen vertragen .  
0,3893 sô sie gewinnent diu kint .  
0,3894 diu von sünden komen sint .  
0,3895 daz was ir seltsæne .  
0,3896 sie was sîn allez âne .  
0,3897 wan daz kint daz dâ vûre gie .  
0,3898 dô si ez ze dem êrsten entvienc .  
0,3899 daz pruovte der heilige geist .

0,3900 âne süntelîche volleist .  
0,3901 von schulden sie niht en swar .  
0,3902 dô sie – gebar .  
0,3903 der mit sîner geinwürte .  
0,3904 unde meitlicher gebürte .  
0,3905 die süntære getrôste .  
0,3906 unde die kristenheit erlôste .  
0,3907 Josepch der heilige man .  
0,3908 dô er die ammen gewan .  
0,3909 er gie zuo dem steine .  
0,3910 dô lac diu maget reine .  
0,3911 in einem grôzen liehte .  
0,3912 jâ ne getrûweten sie mit niehte .  
0,3913 zuo ir an die stat gâhen .  
0,3914 dâ sie den glast sâhen .  
0,3915 von dem êwigen sunnen .  
0,3916 den sie hête gewunnen .  
0,3917 daz kint sie dicke kuste .  
0,3918 ez lac ir an der bruste .  
0,3919 daz wênic was ze sehen .  
0,3920 unde vile michel ze jehen .  
0,3921 daz den tôt vertribet .  
0,3922 gein dem diu erde bibet .  
0,3923 daz die berge erschütete .  
0,3924 daz hête dâ gehüetet .  
0,3925 in einem engen luoge .  
0,3926 sîn muoter hête vrôuwede genuoge .  
0,3927 von den êren des wæne ich wole .  
0,3928 die vrouwen an daz liehte hol .  
0,3929 getorsten niht ernenden .  
0,3930 sie muosen vüre senden .  
0,3931 den guoten patriarche .  
0,3932 sie wunderte starke .  
0,3933 wanne daz licht bekæme .  
0,3934 daz gote selben gezeme .  
0,3935 Josepch mit sîner kiuschicheite .  
0,3936 der gap in dâr in geleite .  
0,3937 er sprach “liebiu vrouwe mân .  
0,3938 ich hân getân den willen dîn .  
0,3939 wilt dû sie nû grüezen .  
0,3940 sô gebiute daz sie müezen .  
0,3941 vüre dîn antlütze gên .  
0,3942 ich hiez sie vore dem hole stên .  
0,3943 erloubest dû in die învart .  
0,3944 sô ist dîn êre wole bewart .  
0,3945 ir sin dunket mich sô guot .  
0,3946 daz dû mit in bist wole behüetet .”  
0,3947 sie sprach wie liep ez ir wære .

0,3948 sie scholten sich dâ vore ze wære .  
0,3949 niht langer sûmen .  
0,3950 sie bat den wec rûmen .  
0,3951 des rîchen Kristes magedîn .  
0,3952 diu hiez sie willekomen sîn .  
0,3953 unde bat sie nider sitzen .  
0,3954 dô kêrten sie ire witze .  
0,3955 wie sie daz kint bewarten .  
0,3956 ein bat sie ime gerwen .  
0,3957 unde winden ez mit vlîze .  
0,3958 in diu tuoche sô wîze .  
0,3959 mit lînînen vademen .  
0,3960 dwungen sie zesamen .  
0,3961 den lîchame reine .  
0,3962 unde daz vile heilige gebeine .  
0,3963 daz uns gît ze lône .  
0,3964 die untôtlîchen krône .  
0,3965 unde die engelischen wât .  
0,3966 und ouch niemanndn verlât .  
0,3967 der im wile getrûwen .  
0,3968 mit sament uns wolte er bûwen .  
0,3969 unde dolete daz gebende .  
0,3970 von wîplîcher hende .  
0,3971 Rachel und Salome .  
0,3972 die wâren ze kindelbetten êr .  
0,3973 gewesen alle zîte .  
0,3974 über die gegene wîte .  
0,3975 alle wîplîche site .  
0,3976 dâ sie gewone wâren mite .  
0,3977 die wâren in kunt durch nôt .  
0,3978 unser trehtîn in daz gebôt .  
0,3979 dô sie sîn muoter griffen .  
0,3980 daz sie nider sliffe .  
0,3981 zuo der erde vûre tôt .  
0,3982 ir varwe lieht unde rô .  
0,3983 diu muose dô erbleichen .  
0,3984 sie sprâchen daz sie daz zeichen .  
0,3985 niene mêre hêten gesehen .  
0,3986 unde begunden des jehen .  
0,3987 in wære dicke gesaget .  
0,3988 daz komen scholte ein maget .  
0,3989 diu âne man gebere .  
0,3990 sie jâhen daz sie daz wære .  
0,3991 der alliu werlte ie gerte .  
0,3992 unde an der sie got gewerte .  
0,3993 genâden unde sælde âne ende .  
0,3994 ûf huoben sie die hende .  
0,3995 unde diu herze an der stunte .

0,3996 mit lobesprechendem munde .  
0,3997 durch diu wunder diu sie sâhen .  
0,3998 die kunden sie wole vervâhen .  
0,3999 mit guotem joch rîchem sinne .  
0,4000 daz gap in diu gotes minne .  
0,4001 dô hête der rîche armer .  
0,4002 der mit sînem arme .  
0,4003 al den himel umbeslôz .  
0,4004 ein seledē smæhe . vile ungrôz .  
0,4005 doch er wære den künigen sippe .  
0,4006 er wolte sich in die krippe .  
0,4007 dâ legen lâzen .  
0,4008 dâ diu rinder ûz âzen .  
0,4009 dâr truogen in die vrouwen .  
0,4010 sie muosen wunder schouwen .  
0,4011 an dem kinde hêre .  
0,4012 der wîssagen lêre .  
0,4013 diu wart ervûllet dâr an .  
0,4014 wande er sich zeigen began .  
0,4015 dô stuont ein esel unde ein rint .  
0,4016 daz keiserlîche kint .  
0,4017 daz erkanten sie beidiu .  
0,4018 got der gap in under diu .  
0,4019 einen verstentlichen muot .  
0,4020 unde der sin wart in sô guot .  
0,4021 sie vielen nider an diu kniee .  
0,4022 daz geschach dâ vore nie .  
0,4023 sie êrten ire schepfære .  
0,4024 daz diuten ire gebære .  
0,4025 unde daz dâ komen wære .  
0,4026 aller werlte hêre .  
0,4027 des wunderet verre .  
0,4028 die ammen unde ouch den grîsen .  
0,4029 mit lobe begunden sie brîsen .  
0,4030 daz diu sinnelôsen tiere .  
0,4031 versinneten sich sô schiere .  
0,4032 der milten gotes gûete .  
0,4033 der meitmuoter gemüete .  
0,4034 stuont in rîcher vröuwede .  
0,4035 durch des kindes beschöuwede .  
0,4036 daz sie sach . unde umbe vienc .  
0,4037 daz sie kuste . unde tigen lie .  
0,4038 unde an ire bruste leite .  
0,4039 der engel schare komen gereite .  
0,4040 unde wâren ir dienesthaft .  
0,4041 durch die niugeboren hêrschaft .  
0,4042 arme liute nâhen lâgen .  
0,4043 die ire vihes pflâgen .

0,4044 an der hêren nahte .  
0,4045 mit geselliclicher wahte .  
0,4046 sie truogen kolben unde bogen .  
0,4047 dô kom ein engel gevlogen .  
0,4048 zuo in mit grôzem glaste .  
0,4049 sie erkomen von dem gaste .  
0,4050 er troeste sie unde saget in mære .  
0,4051 wie der heilant geboren wære .  
0,4052 er sprach "iuwer sorgen ir lât .  
0,4053 ich künde iu waz got hât .  
0,4054 nû genâden begangen .  
0,4055 er hât an sich entvngen .  
0,4056 daz bilede sîner hantgetât .  
0,4057 durch den vaterlîchen rât .  
0,4058 daz er die werlt alle .  
0,4059 erloese von dem valle .  
0,4060 den der êreste mennische tet .  
0,4061 ûz der wûnniclîchen stete .  
0,4062 in ditze klagelîche tal .  
0,4063 nû ist diu schulde unde der val .  
0,4064 Adâmes gar verkoren .  
0,4065 iu ist der heilant geboren .  
0,4066 mit vleische unde gebeine .  
0,4067 diu vröuwede ist gemeine .  
0,4068 der schulet ouch ir geniezen .  
0,4069 daz die wîssagen gehiezen .  
0,4070 iuwarn altvordern .  
0,4071 daz ist nû sihtic worden .  
0,4072 ze Bêthlêhêm schulet ir gân .  
0,4073 dâ vindet ir sunder wân .  
0,4074 in einer krippe daz kint .  
0,4075 des ensament alliu rîche sint .  
0,4076 unde die reinen muoter dâ bî .  
0,4077 ein urkünde iu daz sî .  
0,4078 der trôstlîchen wârheit .  
0,4079 die ich iu hân vergeleitet ."   
0,4080 als er in daz gesagete .  
0,4081 in die lufte er sich gehabete .  
0,4082 gein den himelischen tiuren .  
0,4083 daz sie in kûme kuren .  
0,4084 dô komen engegen im sâ .  
0,4085 mit michelre menige dâ .  
0,4086 die koere sînes gesindes .  
0,4087 der ûf der erde in des .  
0,4088 erschînen geruochte .  
0,4089 unde des mennischen heil suochte .  
0,4090 sie huoben ûf unde lobeten got .  
0,4091 sîniu wunder . unde sîn gebote .

0,4092 sîn genâde unde sîne güete .  
0,4093 mit vroelîchem gemüete .  
0,4094 unde mit liebe sunge sie dô .  
0,4095 “gloria in excelsis deô .”  
0,4096 die hirte redeten under in .  
0,4097 “wir schulen den unsern sin .  
0,4098 kêren hin ze Kriste .  
0,4099 wie zeme uns dechein vriste .  
0,4100 daz uns der engel hât gesaget .  
0,4101 von dem kinde unde der maget .  
0,4102 daz schulen wir gerne sehen .  
0,4103 unde gote ouch bejehen .  
0,4104 sîner manicvalten wunder .”  
0,4105 enein wurden sie dâr under .  
0,4106 ob in – bürge .  
0,4107 daz zeichen vunden würde .  
0,4108 sô scholte sie wole gelüsten .  
0,4109 daz sie daz tuoch kusten .  
0,4110 dâ der werlt erloesære .  
0,4111 mit bedeket wære .  
0,4112 dô vuoren sie îlende .  
0,4113 Krist si dâr gesante .  
0,4114 dâ er kint kintlîchen lac .  
0,4115 unde sîn diu reine pflac .  
0,4116 als sie daz ersâhen .  
0,4117 sie vielen in allen gâhen .  
0,4118 der hêrschefte ze vuozen .  
0,4119 mit zahern alsô süezen .  
0,4120 sie satzten sich an diu kniee .  
0,4121 ouwî . wie liep ez in ergie .  
0,4122 dâ sie in unde die vrouwen .  
0,4123 ensament muosen schouwen .  
0,4124 von herzen riefen sie ez an .  
0,4125 unde kêrten vroelîchen danne .  
0,4126 wider zuo ir huote .  
0,4127 sus trôste sie got der guote .  
0,4128 dô Krist der wære hirte .  
0,4129 sîne boteschaft bescherte .  
0,4130 den hirten alsô smæhen .  
0,4131 dô wâren dâ verre unde nâhen .  
0,4132 manige rîche künige .  
0,4133 unde herzogen vrümige .  
0,4134 die hêrlîche lebeten .  
0,4135 unde den êren swebeten .  
0,4136 den sante er niht den engel sîn .  
0,4137 dâr an liez er wesen schîn .  
0,4138 daz niemannd ist sô arme .  
0,4139 der sîn zuhte wile bewaren .

0,4140 sô nider noch sô ringe .  
0,4141 stât der sîn gedinge .  
0,4142 vaste an unsern trehtîn .  
0,4143 er müeze im willekomen sîn .  
0,4144 niemannd im versmâhet .  
0,4145 der zuo ime gâhet .  
0,4146 unde die sünde durch in lâ .  
0,4147 der vindet ouch helfe unde râ .  
0,4148 daz er den tiuvel entvliuhet .  
0,4149 an dem mennischen got niene schiuhet .  
0,4150 wan ungüete unde unreht  
0,4151 iegelich guoter ist sîn kneht .  
0,4152 der diemüetez herze treit .  
0,4153 dem ist sîn genâde bereit .  
0,4154 er ist ouch der bezziste hirte .  
0,4155 des schâf der ræze wolv verbere .  
0,4156 wan er sie beschermen mac .  
0,4157 unde behüete sie naht unde tac .  
0,4158 vore aller slahte leide .  
0,4159 unde gît die êwigen weide .  
0,4160 daz Krist ûf dem velde .  
0,4161 die armiclichen selde .  
0,4162 in dem steine wolte haben .  
0,4163 unde daz geruochte vertragen .  
0,4164 daz er in der krippe gelac .  
0,4165 diu rede diuten wole mac .  
0,4166 die sînen diemüete .  
0,4167 unde die manicvalten güete .  
0,4168 die uns zeigtet sîne lêre .  
0,4169 er ist der steine vile hêre .  
0,4170 der âne mennische hant .  
0,4171 von der velsînen want .  
0,4172 gesniten wart âne meile .  
0,4173 unde diu werlt von dem teile .  
0,4174 wart alliu behüllet .  
0,4175 bedecket unde ervüllet .  
0,4176 daz bezeichnenet der luoc .  
0,4177 dâ in sîn muoter in truoc .  
0,4178 vrî ist er von sünden .  
0,4179 sîn gewalt sô grôz ze allen stunten .  
0,4180 daz in niemannd mac gemezzen .  
0,4181 des schulen wir niht vergezzen .  
0,4182 er ist aller steine bezziste .  
0,4183 er ne lâ die gruntveste .  
0,4184 niht vallen noch wîchen .  
0,4185 er wolte sich gelîchen .  
0,4186 unserre armicheit .  
0,4187 an der broeden mennischheit .

0,4188 dâr umbe daz er uns erhüebe .  
0,4189 von mennischlicher trüebe .  
0,4190 unde uns gebe sîn rîche .  
0,4191 mit den engelen gelîche .  
0,4192 in Kristes nativitâte .  
0,4193 geschâhen vile drâte  
0,4194 siben grôziu zeichen .  
0,4195 diu schulen uns weichen .  
0,4196 daz wir unser sinne .  
0,4197 kêren ze sîner minne .  
0,4198 ditze was daz einez .  
0,4199 daz sich erhuop seine .  
0,4200 ein rinc umbe die sunne .  
0,4201 dô sie was ûf errunnen .  
0,4202 der rinc was güldîn unde rôt .  
0,4203 als ez der heilant gebôt .  
0,4204 glanze michel unde wîte .  
0,4205 daz entwart êr noch sîde .  
0,4206 an dem himel gesehen .  
0,4207 sô wir hoeren jehen .  
0,4208 des himels hêrre zeigte daz .  
0,4209 daz er ie baz unde baz .  
0,4210 uns arme wolte vrôuwen .  
0,4211 sîn wunder liez er schouwen .  
0,4212 ir wizzet ouch umbe daz golt .  
0,4213 der trüebe ez niht verdolet .  
0,4214 –[...]  
0,5111 dô – – .  
0,5112 drîzehen jâre gestanten was .  
0,5113 bî dem bâbeste Alexander .  
0,5114 daz drî hêrren ander .  
0,5115 wurren ime den stuole .  
0,5116 daz er wîselôs vüere .  
0,5117 ûf dem lande und ûf dem mere .  
0,5118 mit vile lützelem here .  
0,5119 dô diu roemischiu rîche .  
0,5120 stuonden gewalticliche .  
0,5121 in des keisers Fridriches hant .  
0,5122 und er Pôlâne daz lant  
0,5123 bedwanc mit hereverte .  
0,5124 dô im got siges gewerte .  
0,5125 dô . wurden diu liet alle driu .  
0,5126 getiht under diu .  
0,5127 daz êrstez daz saget  
0,5128 von der êwigen maget .  
0,5129 wie sie ire muoter gewan .  
0,5130 bî einem vile werden mane .  
0,5131 der Joachim geheizen ist .

0,5132 daz ander zelet die vrist .  
0,5133 daz sie wart gemaheret  
0,5134 als der heilant gebôt .  
0,5135 daz dritte saget daz sie gebar  
0,5136 der himel und erde gar  
0,5137 ûf habet [...]